

清代筆記叢刊  
薈編

俞樾著

二





薈叢編卷四

清 曲園居士纂

劉宏甲

劉宏甲字天繩單父之城南人也父字曰具瞻以康熙十年經歷雲南澂江府道遠故宏甲及其弟宏基奉母趙氏留於家及吳藩難作不通問數年寇平道復通宏甲與其弟亦已先後為弟子員乃以尋親事請於母曰宏基可任子職願無以兒為念於是壬戌七月攜一僕渡河越二月達貴州平越府及其僕病於旅次無何僕死宏甲伏枕痛哭不知所為會居停主人王良梧者素慷慨好義聞哭聲訊而心憐愛之曰孝子也若好將息南行事吾將為若謀於是良梧為營葬其僕而宏甲病亦少差因以言察其意曰甯有人可共緩急與俱之澂江者乎良梧唯唯有間又問曰君以孤弱入不測新定之地而欲求可與俱殆非吾所知可知獨有吾耳宏甲感極而泣因以酒酌道路之神約為兄弟離平越而去是時越州土寇起城鎮戒嚴常露宿而幸無虞良梧力也又宜良縣裁軍刼略路人大哨坡遇數騎持刃怒逼良梧哀告以尋父事賊義之得不死腰纏外舍衣被於地曰汝好人留此禦冬而良梧所分挾

金獨以智匿得全。故可資以達激江。然激江經歷司已有別員。詢舊胥始知其父住永昌數年矣。宏甲念當更行二千餘里。辭良梧。良梧曰：為德不卒。吾嘗以為惡行耳。他無可言者。及至永昌。始聞其父實在騰越州之界頭鎮。州過府治三百餘里。界頭又西行百二十里。瀘水出其東。緬甸八百媳婦皆在其北。有永昌張媪買一山居焉。而具贍為其贅壻。宏甲喜。倍道重趼至其門。疾入而呼。有長須出曰：來奚自。且何音似山東。蓋此疇昔從任之僕從也。有頃。父亦出。宏甲跽捫其足而哭。父愕然曰：子為誰。曰：我子某也。乃亦撫其背而哭焉。於是問家事。命宏甲以諸母之禮見張氏。張故賢亦為慶勞云。乃婉言開導。張意以癸亥十月奉親還。單父王良梧至鎮。遠始別去。其籍本山西平陸。後一年來省。分以田宅。並其弟有妻子於單。成土著。以嘗與宏甲約為兄弟。不忍離也。其後具贍卒。張氏與趙氏居甚歡。及既葬。亦以疾卒。宏甲附其柩於父。使張之義男宏兆主祀事。以昔母子之養田三百畝盡予之。

見盧錫晉尚志堂集。

### 徐仁寰

徐安世。字明情。號仁寰。考諱廷錫。號穀我。以長子韶階貴。封中憲大夫。君齒居季。天性至孝。輕財好施。弱冠補博士弟子員。明天啟朝。魏璫用事。令其黨崔文昇來江南。

名為督漕。實則乘閒抵隙。借以排陷搢紳家。而穀我性嚴毅。素不悅於里胥。遂以官戶誤漕。羅織穀我名以上。於是文昇疏入。緹騎猝至。急命縣令逮人。赴淮就質。穀我不得已。拂袖欲往。君牽衣泣曰。大人老矣。奈何遠行。且邇者魏璫柄權。擅作威福。舉朝士大夫俱橫被刑傷。官署一空。而伯兄居官久。為羣小所側目。大人往知不免。兒願乞哀。緹騎請以身代。死生聽之。穀我強留之不可。乃行。抵淮。文昇兀坐堂上。詰責君堂下。君反復抗辯。不少屈。文昇怒杖君。君隨杖下斃。家人輿尸出。悲動行路。猝遇黃冠道者。從東方來。熟視之曰。死者尚可生也。爰取袖中末藥。置創處。君立醒。黃冠倏不見。或者歎為神助云。文昇信君死事得解。君扶創歸。父子相抱大泣。繼復引觴大笑。由是邑中咸稱君孝子。名籍甚。厥後懷宗即位。魏璫伏誅。然國脈已大傷。君遂棄舉子業。鍵闔遁世。時時以詩酒自娛。入國朝。與鄉黨二三君子唱酬往還。嘯傲山水。論者謂有陶阮風致焉。見儲欣在陸草堂集。

### 瞿秋崖

瞿秋崖。名士屨。字縵雲。上海邑庠生。性孝友。父病劇。夜籲天。乞減己年。以益親。算居喪不飲酒食肉者三年。後遭母喪。亦如之。其篤於至性如此。初江南巡撫朱國治。

性殘刻。尤與士大夫為讐。命守令查通賦者。臚列其名。以上聞。且謂不重懲。無以示警。於是闔省搢紳之官於朝者。居於鄉者。或宦於四方者。自科目貢監。以至諸生。其甲戶之名。有欠一兩或五錢。下至於三五釐者。無不被褫革。繫囹圄。而郡邑庠中文學之士。無一二存者。秋崖之長兄青岑。時為粵西岑溪令。有政聲。而竟以逋糧。幾被逮。秋崖與仲兄為臬。相對泣曰。伯氏曾邀恩典。榮及父母家之賴也。我名可黜。兄名不可玷。于是為臬代其兄下獄。秋崖盡鬻其田。代償厥逋。卒之。青岑以降級免。而秋崖竟坐誅。其孝而能友。又如此。庚子辛丑間。士之抱奇才。負積學。而以此案終其身。淹沒不彰者。不可勝數。而秋崖則以友愛得之。於是江東之人。無不嘖嘖。操觚之士。無不出其門。咸謂之江東夫子云。秋崖有子曰標奇。其文品一如秋崖。秋崖父子之在里門也。各館於某氏家。歲時伏臘。從館歸。父子相聚談。燭不再跋。不休及卧。不歸私室。父子必同寢。父抱子足。子抱父足。一若慈母之戀嬰孩。嬰孩之戀慈母。雖頭白未嘗有異焉者。嗚呼。孝子之後。必生孝子。於秋崖父子信之。

見張永銓  
閑存堂集

### 張麒

張孝子名麒。字瑞徵。山陰人也。長於京師。十八歲遭闖賊之變。城陷時。孝子父楚遊

未歸。急匿其母他所。旋挈其妻。賊已大入。度不免。呼妻劍其首。仆復橫擊其面。鼻吻俱斷。乃去。遇賊縛之。榜烙無完膚。罵不屈。給賊登樓。自後窻踊身下。悶絕。樓下故亂石堆。無寸隙。蘇視石。劃然開。身無損。忽一老扶杖至。二犬躍隨之。跪請救。老人曰。吾覓爾久矣。急去。吾救爾。言畢不見。出果免。又聞道涉海。溺焉。若有物負之出。得不死。妻被刃亦未殊。三日夜氣不絕。救之復生。終身不怨。又為夫置側室。乃前十年死。

見王源居  
棠堂集

### 王將軍

王將軍名好智。其先山東新城人。遷遼東海州衛。少從戚將軍繼光游。戚甚重之。教以兵法。中萬歷某科武鄉試。歷任邊疆最久。及遼左兵興。隸島帥毛文龍麾下。年已五十餘。累功至副將軍。為人高颯。長須偉幹。沈勇多力。挽弓八鈞。揮雙鐵鞭。重斤二十有四。號王鐵鞭。後文龍以譖死。將軍懼得罪。帥壯士五百人入海島漁獵自給。久之。聞周將軍遇吉鎮甯武關。遂往依焉。當是時。李自成勢甚張。崇禎十七年正月。賊圍太原。分兵向甯武。周將軍再戰再捷。殺賊萬餘人。賊益兵來攻。戰不利。將軍時年八十。每食尚能盡一豬首二鵝。謂周將軍曰。事急矣。我與公共命。殺賊庶可退乎。

周將軍曰止。賊勢大將不支。我且死。翁無疆場責。無祿。胡為爾。翁去矣。將軍毅然曰。吾曩不食君祿乎。今得効死。報國恩。幸也。且公遇我厚。我不應死報公乎。我八十矣。更何求。言罷。目閃閃。慷慨奮袂。推案起。周將軍壯之。相與痛飲。披甲上馬。時大風起。沙飛晝晦。周將軍出南門。當賊鋒。將軍由北門出。為奇兵橫擊之。賊列陣十餘里。將軍揮鞭大呼。競入。賊披靡。殺數百人。顧賊眾。與周將軍勢分。不能合。或傳周將軍被圍。則深入救之。不知所在。出則又入。賊大驚曰。此老將銳不可當。難與敵。乃選善射者千人。環射之。麾下士俱盡。將軍力不支。遂死。周將軍血戰兩日夜。殺賊數千人。力竭被執。大罵不屈。賊磔之。夫人劉氏。率內丁巷戰。亦殺賊無算。被磔。與將軍三首同懸市上。見者流涕。將軍一僕曰王印。匍匐亂屍中。尋將軍不見。見一馬死草澤間。泥沒腹。箭集身如蠟。鐵鞭一。倚鞍立。則將軍之馬與鞭也。印大哭。即馬傍求之。得一臂一束帶。臂有誌。識之曰。此將軍臂也。遂以帶繫鐵鞭。負之。奉其臂。與將軍之孫永命。招魂而葬之。

見王源居  
業堂集

曲園居士曰。周忠武死甯武關。事跡甚著。而王將軍事無知者。不可不表而出之也。俗傳周忠武為亂箭射死。殆即由王將軍事而訛。

秦舍人

秦舍人敬傳字公麟京師人勇敢多智畧人有急則毅然出為排解力護持之孫某者布政使子舍人妹婿也夙無行與舍人有隙闖賊臨都城孫為賊獲索金十萬繩其腦孫謬曰吾有金數萬匿內兄秦生所得秦金即得賊果繫舍人舍人至見孫輒轉哀號睛突出寸許遽呼曰渠實有金付我釋渠即有金賊喜釋之顧舍人曰金安在舍人笑曰安所得金賊怒曰若適言有金誑寸磔矣舍人復笑曰非誑也實有金顧危城中我貧士土垣敗牖數萬金匿何所我蓋受而藏之百里之外公請釋之去身在過十日無以獻鼎鑊惟公命賊渠共十八人方擁婦人飲酒噴曰此秀才亦邁爽雖然而公烏能待而以十日三日可舍人即曰三日可賊大喜縱孫去而與舍人飲酒大醉期三日後納金無爽舍人歸念計無所出惟罵賊死耳俄道逢一賊從百許人呵而過顧見舍人大呼曰若非秦郎耶今將安往視之則故孫氏家奴從賊為裨將者下馬握手慰勞舍人泣告以故奴問十八人名曰此妄耳此甚微何得索人金郎君無恐即引以見一賊魁請令往縛十八人者悉斬之舍人乃得脫舍人為文縱橫奇宕名重庠校及鼎革益貧文益高癸卯始登賢書甲辰成進士丁未授內閣



撰文中書舍人

見王源居業堂集

### 高文彩

高文彩字奎所京師人初為信王書堂官龍飛授錦衣衛百戶晉千戶闖賊陷京師文彩拔刀顧其子必卿曰我布衣從龍得至此不能為國殺賊一死不足報國恩我欲全家死國爾得無怨乎必卿應聲奮衣拔刀起先自殺其妻文彩亦殺其妻家人大呼擾亂闔門男女無少長皆手刃之一孫甫數歲乘間匿牀下呼之不應其父頓足曰惜失此兒父子遂相向自剄越二日其從兄文極使人偵之見屍骸相枕藉驚哭謂為賊所屠孫聞人聲自牀下走出使者曰若非某郎君耶抱持之哭且問故孫具言歷歷如成人且曰阿翁連呼我不應我兩日未敢出使者負之歸文極大驚棺殮之父子猶手握刀不釋

見王源居業堂集

### 李若連

李若連字方山上林苑人崇禎元年武進士授錦衣衛千戶掌北鎮撫司坐失出降秩二等革任家居壬午起補南鎮撫司僉書賊犯京師與駙馬都尉鞏永固守崇文門城陷歸書絕命詞于几曰上林李若連為官不愛錢身名豈肯辱清白及黃泉冠



帶縊死後賊居其室見絳衣人奮拳毆之賊畏之他徙人謂李公為厲鬼殺賊云見王源居業堂集

### 王百戶

王百戶逸其名亦京師人官錦衣與庶吉士周鍾善鍾主其家賊圍城百戶知不可守與鍾約同死鍾佯許諾城陷百戶繫兩縲於堂酌酒謂鍾曰此我兩人報國時也鍾俯首默不應百戶又曰君名重當時死即千秋不則不值一錢我平日重君以君讀書稱學者今可猶豫持兩端乎鍾唯唯頃之易服竊出降百戶追及門力挽之鍾絕帶去百戶歎曰周鍾降賊不唯負國且負我國家設科目取士所得乃若輩亡國宜矣我不忍與同生乃縊見王源居業堂集

### 陳衷壹

陳衷壹逸其名以字行鳳陽諸生幼喜兵好奇計岸異負大志鄉里一男子忽款衷壹門直入叩頭求救死衷壹叱曰若狂耶我初不識若何罪我何力救若死男子曰我夜夢鬼卒攫去曰汝應死某惶泣籲生過一廟卒曰廟中神可活汝某曰何神也曰此汝邑陳君衷壹也遽挾之入而覺言罷復叩頭流涕固以請衷壹大笑書赦汝

二字擲之曰吾赦汝其人欣然謝去遂無恙。表壹由是益自負。巡撫鳳陽朱大典聞其名聘之不能用。三上書閣部史公亦不用。汝甯大俠劉扁子者聚鄉勇數萬保山。若拒賊獨與表壹深相結。會南都潰扁子自盡其眾亦散久之表壹不自聊歎曰吾不能為將相封侯當作神仙白日起舉耳。遂棄家為道士游五岳徧歷九州名勝求神仙。涉海數萬里訪三山西過洱海北出嘉峪關東北越松花江千餘里乃神仙卒不可得。而表壹且老歸語人曰神仙必可得但未遇耳。使我壽百年神仙豈終遠乎。表壹後頗得延年術服食導引年八十餘精力不衰。

見王源居業堂集

### 王大本

尉氏有王大本者諸生為賊帥封伯京師陷大本與他賊四人共得懿安皇后四賊不遜大本怒曰此一代國母胡可干也手刃之懿安死而未辱。顯上高澤生為余言。

澤生字孔霖留心當年軼事其言足信。

見王源居業堂集

### 諸天祐

諸天祐山東東昌人也少任俠喜交游。倜儻有大志游關中數年不歸。崇禎十六年西安陷關中望風降附。天祐率壯士十八人入河州據之募兵千人欲襲西安賊遣

萬人攻之。大敗。依山結營，不敢出。久之，天祐率三十騎間道出山後，偵賊。望見賊無備，乃留騎山上，令曰：「我下襲之。若見賊亂，即馳下。」乃單騎緩轡趨賊壘。賊初不戒，近始呵之。天祐大呼曰：「我大膽諸將軍來取賊首。」躍馬繞營走，賊錯愕爭搏之。營亂，三十騎自山上馳下，呼曰：「大軍至矣。」賊驚潰。天祐擒斬數十人歸。由是名震關中。十七年，賊長驅渡河，向京師，分遣偽權將軍以精兵十萬取河州。天祐力不支，亡走山谷間。三月，賊陷京師。天祐復起兵鳳翔，凡四十二人。鐵虎頭者，嘗從總制洪承疇殺賊立功，後辭去，隱居終南山。天祐遣其將汪鳳容、柳含往請之。虎頭慨然曰：「諸公以義召我，我何辭。我年幾六十，尚惜死乎？」立起謁天祐。當是時，自鳳翔以北，南達漢中，西踰隴山，若豪傑莫不暗受天祐約束。賊中亦有期內應者。俟天祐大衆集，同日起。天祐憤不能待，與虎頭等出山，號招，猝遇賊步騎數千，至即前突之，斬其前鋒將，殺數十百人。初，天祐在河州，嘗與賊戰，望見賊中軍大纛，挺戈突入，賊將辟易，橫刺擁纛者下馬，奪其纛，馳還。賊將隨後呼曰：「諸將軍，我知公天威，今奪我纛，何面目見人？」幸哀憐，還我纛。天祐大笑，擲與之。至是其將適在軍中，目曰：「此諸天祐也。」賊大驚，益請兵圍之。天祐知事不濟，歎曰：「我起兵報國，卒困於此，天也。吾當畢命。」此賊馳赴之，賊

圍之數重。天祐四面馳突。王某望見曰：事急矣。潰圍入。解甲授天祐。翼之出。遂各脫身走。天祐馬蹶死於陣。虎頭為賊獲。大罵不屈死。關中豪傑聞之皆流涕。

見王源居業堂集。

### 王義士

王義士失其名。山東人。幼業農。嘗從兄耕。時多盜。兄誡曰：慎毋聲。盜聞將劫吾牛。義士方八歲。揮鞭大呼曰：賊來即殺之。兄懼走歸。義士驅牛耕達旦。鄉里皆驚異之。及長。多力。善擊刺。精火攻。膽畧過人。忠誠出於天性。嘗有友遇難。託其妻。義士躡屣挽車送之歸。周旋千里。未嘗敢仰視。以是名益重。諸天祐者。秦中大俠。驍捷善戰。嘗憤逆賊猖獗。欲合義旅勤王。與義士結為兄弟。部署既定。大衆未集。時四十二人先起於鳳翔。賊發步騎二千急擊之。鼓行而前。天祐以二十人分兩翼逆擊。斬一裨將。殺百餘人。賊大驚擾亂。退數里。復合兵環而進。矢石雨下。四十二人談笑接戰。復殺賊數百。鏖戰三日。夜。賊益衆。力竭。天祐遂為賊困。圍之數重。義士大呼躍馬馳入。左手運矛。右手解甲。與天祐。天祐不受。義士曰：天下可無我。不可無公。強擐之。潰圍。翼天祐出。四十人爭呼曰：王君真義士也。遂各脫身走。天祐竟以馬蹶被害。前所部署皆解散。義士痛哭曰：兄死。我不欲獨生。生終必為兄報仇。乃撫其妻子。並傾橐。招四方

奇士圖再舉會國變遂隱身秦晉間或曰今在山東人嘗見其縱鷹獵海上云見王源居

葉堂集

### 劉長庚

同州諸生劉長庚字醉白少剛介尚義負士望崇禎十六年督師孫公傳庭戰歿賊乘勝陷西安闕中望風降服長庚歎曰勢不可為矣乃趨孔子廟哭拜焚衣巾於殿下歸而拜辭祖考登樓痛飲悲歌竟日題詩滿壁上妻黨氏妾雷氏子二女一皆幼謂其妻曰若老矣可無死為我撫二子顧其妾曰若少將安歸妾泣曰君死敢不從君死長庚笑曰信乎妾曰君不信妾請先君死長庚大笑起而揖之指樓前地謂妻曰葬我於此於時拔刀先殺其六歲女繼殺其妾然後從容整衣引帶自縊死其妻葬之樓下邑人聞之皆流涕國初建祠祀之康熙三十七年知州金人望修其祠訪其後人二子死矣獨一孫窮賣餅乃請於學使假以諸生服祀其先又捐金為娶婦置產以延其後云見王源居葉堂集

### 五公山人

五公山人隱者也隱於五公山故號五公山人王姓名餘佑字介祺保定之新城人

負王佐才年七十。不遇卒。門人私謚曰文節先生。初山人父延喜。縣諸生。尚義。天下亂。散萬金產結客。三子。長曰餘恪。次即山人。季曰餘巖。山人出繼世父。建善闡賊陷京師。山人父率三子。及從子餘厚。餘慎。與雄縣馬魯建義旗。傳檄起兵討賊。擒偽官郝丕績等斬之。大清師入。山人父為仇家所陷。執入京。餘恪。餘巖謀曰。父死。吾兄弟何面目視息人間。仲繼世父不可死。吾二人其死之。乃赴難。夜馳至琉璃河。聞人唱伍員出關曲。餘恪憮然曰。阿弟誤矣。吾二人俱死。誰復仇者。若壯可復仇。我死之。乃揮餘巖去。自赴京。大呼我起義生員王某長子也。來赴死。遂父子畢命燕市。餘巖歸。率壯士入仇家。殲其老幼男婦三十口無遺。於是急捕山人兄弟。會保定知府朱甲。易州道副使黃國安。力為解。乃免。山人於是隱易之五公山。與太原傅山同郡。張羅詰呂申諸子。日相切劘。嘗集古人經世事。為居諸篇十卷。萬勝車圖說一卷。兵民經絡圖一卷。諸葛八陣圖一卷。皆霸王大略。兵機利害也。又十三刀法一卷。湧幢草三十卷。文三十二卷。其為文數千言。立就書法道逸。而感慨激烈之致。一發於詩。與人。和易從容簡諒。至論忠孝大節。談兵述往事。目炯炯如電。聲若洪鐘。或持兵指畫。須。戟張蹲身一躍丈許。馳馬彎弓。矢無虛發。觀者莫不震慄。色動曰。王先生命世才也。

胡穆孟

胡穆孟閩人。其先以武功世襲衛指揮。父上琛當唐藩亡國。率家人朝服北向再拜。仰藥自盡。闔門殉難。僅餘二子。穆孟其長也。穆孟少遭變故。孤苦無依。右衛守備王邦鎮有女素聰明。知大義。以穆孟忠臣之後。因許字焉。穆孟將門子。韜畧騎射。少成習。莫鼎革。襲除。無以自効。勉應武科。投鄉試。而連江沈廷棟。以同年友雅善。穆孟嘗讀書山寺。旁有荒寺。至夜。輒聞人語。謔穆孟潛往窺。見燈燭煌煌。數十人列坐左右。分校簿籍。若掾吏狀。穆孟竊疑荒山中。豈有長吏。期會簿書。如是其急耶。微詢。故有對者曰。邇者劫運將興。四方有亂。民遭兵戈刑獄之厄。不可數計。凡劫中人。悉已定。此其籍也。穆孟試取一帙就視。則己名在籍中。倉皇自失。眾忽不見。穆孟自是始戒心。淡然無復功名之志矣。甲寅靖南王反。徵武甲武科。以為車騎。驍騎諸常侍。穆孟堅辭偽命。逃之連江。就廷棟家。廷棟房師。為某縣知縣。某以事至省。廷棟具書幣修候。已入。緘未發也。穆孟竊視其書。中述靖藩舉動乖亂。人心不屬。難成大事。駭曰。此何等語。豈可形之筆札間耶。往必取咎。因取書潤色之。稍隱約其辭。自為更書。入故



緘而廷棟未之知也。以付使人。至城下。為門者所詰。索得其書。涉誹謗。發書刑曹。逮廷棟窮治。伏辜論死。穆孟聞之。直奔還。謀諸婦曰。沈七罪固當。然其母老妻幼。焚焚未有後。若赦之。痛可念。為之奈何。婦曰。沈母春秋高。臨年見愛子受戮。必無生理。其妻無依。亦必偕亡。是沈君一死而三人俱斃也。君素善沈君。安容坐視。穆孟曰。然。今惟吾可以代沈君死。但未知卿意何如耳。婦曰。殺身取義。此烈丈夫事也。君為奇男子。妾甘守愚婦乎。君忠臣之後。有呱呱在膝下。天道不遠。必不使胡氏無後。孰與沈君有滅族之慘耶。君勉之。毋以妾為念也。顧策將安出。穆孟因語之。故即赴刑。曹具狀自伏。刑曹疑之。召廷棟與質。廷棟實不知易書由。爭死甚力。穆孟曰。書實吾所為此。易辨耳。今第使兩人各具書。書跡同者坐。復何辭。刑曹然之。使書果。穆孟筆。乃釋廷棟。而辟穆孟。論決之日。王氏設奠西市。哭極哀。取其首而縫之。具衣服殮。且市兩棺。屬其子於廷棟。與穆孟之弟。令撫視之。而自縊于尸側。觀者數千人。莫不感激泣下。傷穆孟之無辜。而歎王氏之烈。明年王師復閩。贈穆孟官。蔭其子。而沈廷棟亦以武科需次授永定門千總云。

見方  
通集



京師有金剛寺。蜀僧友蒼居之。萬歷末。一男子配遼東。過寺。友蒼壯其貌。飯之。贈之金。國變後。友蒼南游。過徐州。泊舟登岸。間行。至一寺。時初冬天寒。寺荒落。無人居。友蒼徘徊太息。見廡下一瞽者。踞而暴問曰。公何自來。友蒼曰。自京師。曰。京師有金剛寺。曾過未。曰。吾所居也。瞽者瞿然起曰。友蒼和尚。公識否。友蒼怪之曰。吾亦與交。但子何由知之。曰。吾曾配遼東。友蒼飯我。贈我金。我不忍忘。友蒼始追憶其事。大笑曰。我即是也。瞽者驚喜。直前捉其衣曰。公真是耶。伏地拜且哭。友蒼且答且掖之。起而挾之舟中。曰。子何以至此。瞽者曰。我至關東。受知經畧熊公。拔為千總。後熊公被逮。久之。聞被戮。予仰天哭曰。國家失熊公。不可為矣。晝夜哭。月餘。淚盡血出。遂以瞽。既廢。又遭亂。流離輾轉。無家行乞於此。友蒼歛。歔泣下。飲之酒。大醉曰。我今其可以死矣。夫薄暮別去。次日訪之。自經死矣。見王源居業堂集

### 劉龍光

順治乙酉五月。王師破建昌城。明益王遁去。長史劉君某。挈家亡匿山中。卒。其伯子龍光。即孝子也。為諸生。先赴試。歸吳。未得父耗。憂泣成疾。戊子歲。始決策。至盱江。時亂後。藩府毀廢。舊人無在者。邑有張令公祠。宿禱焉。夢中恍惚如聞人語。曰。寄居石

淙者醒求其地不得。傍徨道左。遇一尼謂曰：石淙在閩廣交。今方阻兵道塞。有徑潛行。七日可達也。遂如其言。取道往。所過藤峽通仙。一綫天。皆山谷窮絕處。蒲伏晝夜行數百里。不見人煙。最後至白石嶺。嶺陡切雲漢。阪道陜者纔六七寸。俯臨不測之溪。捫壁絕險。既上復下。履巉巖。衝虎豹。攢棘被膚。血流殷足。每仰天一號。則陰風颯然。山木悲嘯。瀕於阽危者數矣。嶺盡得村。尋得父所依姚氏居。母管孺人在焉。既入門。母子相持而泣。已問知父喪行一年所。則號絕仆地。久之始甦。居數月。間關輿櫬復侍母而歸。初長史避難數遷。獨攜先世世系圖冊一篋。自歲戊子。母時聞有聲窸窣。罕出篋中。啟鑰無有。閉則復然。一日。母見緋衣人數輩。冉冉自篋中出。益大驚。逾宿而孝子至矣。其所居村曰見娘堡。舊傳宋王龍山者。於此見母得名。異矣哉。鬼神幽明之故。君子之所慎言也。而父子骨肉之間。顛沛流離之際。又往往若有陰相之者。非苟然而已也。孝子字蓼蕭。蘇之長洲人。

見姜宸英湛園未定稿。

### 陳繹思和本初

陳確。字繹思。金陵人。從父官長沙之湘鄉。遂家焉。為人尚大節。不治生。工詩字。所居一茅廬。書數卷。竹數竿而已。與北方人和本初友善。本初者。其父由武舉官守備。而

本初事文藝隸善化序。名藉甚。繹思好游。歷九嶷。登滕王閣。走山陰道上。歲以為常。本初連試有司不得志。亦下舟淮揚間。康熙癸未春。有官粵者。羅本初幕下。本初曰。吾有友陳某。客永新。不相見數載。能迂道訪之。從公游。其人許之。中途易小舟。逶迤入永新。未至。誤墮水死。時繹思從夏葛民幕。永新意忽忽無聊。移寓蕭寺。日買酒爛醉。醉則吟。搖筆如飛。閒狂歌拔劍。呼故人姓名。葛民莫省其故也。本初訃至。疾走撫棺大哭。氣幾絕。家人救復甦。有間曰。本初為我死。吾何復求活。吾將從好友地下矣。不食卒。兩主人各厚殮之。買舟送歸長沙。人無識不識。皆太息云。

見曹耀珩聽濤園集

### 東江先生

先生姓唐。名孫華。字實君。江南太倉人也。別號東江。晚又號息廬老人。九歲。織簾先生顧麟士見而奇賞之。十九歲補博士弟子員。恒為諸生領袖。時復社餘波判二派。曰慎交。曰同聲。各各植門戶。張旗鼓。爭欲致先生。慎交得之而彌振。里中張氏有學山園。邱壑絕勝。主人延先生坐園中。順康之間。文風初變。採選政者無慮數十家。坊賈爭請刊布牟利。視行否分贏絀。先生乃哀名流傑構。評隲為學山園選本。自是而諸本悉廢。業科舉者人抱一編。若金針寶筏。熟其程度。取青衿登上第。猶掇之也。而

先生顧浮沈諸生中。且三十餘年。省試入場屋。常自晦匿。不欲人知。鄰鋪中有問字者。竊窺先生卷端。見籍貫姓名。驚曰。乃唐夫子耶。招手相告。語傾號舍。聚觀羅拜。請教益。年五十一。始以明經貢入太學。崑山徐健庵司寇一見禮重。時健庵以文章聲氣籠蓋一世。海內名士奉為宗工。既盡出所緝經解。付門生納蘭容若。校讐而梓之。謂先生曰。惜未與君一一商榷也。納蘭容若者。北門相公之子也。負軼才。不永年。有弟納蘭愷。功方求知名士為師。北門相公遂禮先生。而致之賓館。愷功年富志銳。慧辯過人。每舉史傳僻事疑義。以相質難。先生引端竟緒。答無留滯。愷功心厭氣折。後位至六卿。久長翰林。其視諸翰林。莫先生若者。先生解組後。存問不絕。為刊詩集若干卷。晚年寄草堂資。而先生始有息廬之築。當丁卯之在北門館也。先生初舉京兆試。明年成進士。年五十有五矣。念太翁春秋高。遽歸侍。時健庵司寇亦去官歸。奉詔修一統志。以書局自隨。開局洞庭東山。廣集賓從。招先生往同事。一時湖山詩酒。縹緗翰墨之樂。望而生羨者。數為神仙中人。健庵卒而局散。北門復移書固邀先生入都。甲戌太翁趣就選。得陝西朝邑令。上咨訪實學。廷臣多舉先生以應。遂召對乾清宮。西暖閣稱旨。改授儀曹。兼於翰林院行走。蓋異數也。明年調吏部考功。又明年典

試浙江。撒棘。有考功司註誤處。公即愉然而歸。自是不復出。太翁號丹崖。湛深經術。為復社眉目。先生歸之明年。為太翁舉九十壽觴。先生年六十有四。斑衣華髮。人謂老萊子復見也。先生之歿也。年亦九十。父子大耋。若秉符券。致可異云。先生為諸生。蓋三十年而羸。登第仕宦。不及十年。而優游林下。則亦近三十年。既歸田。謂人曰。吾結髮受書五十餘年。而於經學未歷其堂奧。吾將從事焉。吾以縣車之年。為鼓篋之始。其可哉。由是學彌邃。癸未上南巡。先生迎蹕於吳門。納蘭愷功以掌院學士在左右。私於先生曰。上注意先生。先生亦有意復出乎。謝曰。吾年七十矣。即在位。義猶當退。顧且出何所求耶。先生不講道學。而見徹名理。踐履平實。不談宗祧。而深達諸相。空諸一切。飲酒不能盡一卮。食恒不令飽。嘗云。吾見人腰腹偉然。善噉兼人。率不過中壽。衛生要術。肥不如瘦。故先生雖末年。耳目聰明。手足便利。或云七十以後。令少女同起居。長則遣之。皆宛然處子也。覩顧存

### 王冰庵

太倉詩人甲吳會。百年之中。名家輩出。推厥領袖。皆曰唐王。唐謂東江吏部。王則冰庵太守也。公名吉武。字憲尹。別號冰庵。公生三歲。不好弄。惟與之書一冊。則反復不

厭五歲痘疹發。瀕危而蘇。大父作痘吉志喜詩。就塾後。授以唐律。誦如素習。師出句索對。應如響。而句輒新異。壬子與經師周韋庵同發解。丙辰成進士。授中書舍人。陟民部郎。出守紹興。治用寬簡。迂大吏意。甫二年。中計典去。年五十耳。敝廬數椽。汙萊二頃。日匡坐。雜誦不輟。公於詩固由天性。亦稟家風。祖孫父子兄弟。人有集。而母吳夫人及三女。咸工詩。家庭無事。輒命諸子女拈題分詠。夫人為第其高下。以為笑樂。既嫁。至老猶詩筒往來不絕。明季若趙凡夫。陸卿子。沈君烈。薄少君。夫婦唱酬。擅婁江佳話。未足多也。公與唐吏部東江詩名相埒。交亦相厚。然不為苟同。每集公所。若燕會。東江劇談今古。掀髯抵掌。蟬聯不斷。公則凝神定息。不發片語。有當於心。聽然而已。公艱於子。養子宗驥。猶子安國。安國為諸生。傳詩學。見顧存序集

### 毛鶴汀

毛先生名健。字今培。號鶴汀。江南太倉人。弱冠補諸生。祖中書公。欲令專事三場。為援例人成均。先生於科名得失。殊不介意。數年。選得貴地訓導。其地有齊山九華之勝。欣然命駕。未匝歲。丁外艱。服除。選望江。以母老不赴。又數年。選祁門。以疾謝。竟不復出。婁東詩社甲於江左。論先生之世。首尾康熙六十年間。其初年則有十子之目。

十子以後名流益衆。唐東江王冰庵為之祭酒。而先生已綴其列。其晚年則有蕙帶涇東洗桐裴山敬亭之屬。而先生猶儼然臨其壇。建其旗鼓。初太原王秀才漢舒工填詞。詞曰香雪無敵手。王涇東顧洗桐繼以填詞相頡頏。王詞曰香濤。顧詞曰片香三香若鼎足。詩家皆謂餘事。因推讓焉。子頗自負。獨下漢舒。王蕙帶效作。輒病語硬舍去。先生笑曰。吾老於詩。不律禿矣。請嘗試之。後遂取王洗馬所輯歷代詩餘攻之。踰兩月不出戶。一日讌集。出所填詞數闋示二子。二子色然駭曰。何工之速也。相顧歎異。見顧存好集

### 嚴孝子

山陰嚴某。於康熙甲戌乙亥間。挾貲入粵東。轉客瓊州。往來貿易於海北。貲漸饒。寄籍樂會。置田園。娶婦生二子。歷三十載。未嘗通音問於家。方出門時。有子纔三齡。其婦教育婚娶。得為諸生。授徒以給食。一日。其婦呼子而謂之曰。汝父客外久。我向不令汝往尋者。以汝尚幼。且無兄弟也。今幸有孫矣。天下豈有無父之人哉。其子承命往廣州。遍問於人。或傳在高涼。或傳在粵西。於是由高州入嶺西。無蹤跡。復回廣州。而資斧已竭。遂入海珠寺為僧。欲陰以訪父信。主僧憐其孝。許之。一切文疏俱委焉。雍正五年。嚴某攜貲由海舶往省城。遇大風濤。禱於神而安。及到省。酬神於海珠寺。



其子為書鄉貫姓名。心頗訝之。急問其客游歲月。知即父也。泣跪於地曰。兒生三歲。父遠行。今三十年矣。尋父兩載不獲。流落為僧。日夕禱祝。今果得見吾父。而某復詳問家中事。皆合。於是相抱大慟。出五十金謝主僧。而攜其子歸。寓售貨得千餘金。偕歸山陰。惜忘孝子之名。觀沈元滄滋蘭堂集。

### 白雲先生

張怡字瑤星。上元人也。父可大。明季總兵登萊。會毛文龍將卒反。可大死之事。聞怡以諸生授錦衣衛千戶。流賊陷京師。遇賊將將肆掠。其黨或義而逸之。久之始歸故里。寄攝山僧舍。不入城市。鄉人稱之曰白雲先生。當是時。三楚吳越耆舊多立名義。以文術相高。惟吳中徐昭法宣城沈眉生躬耕窮鄉。然尚有楮墨流傳人間。先生則躬樵汲。口不言詩書。四方冠蓋日往來茲山。不知山中有是人也。架上書數十百卷。皆所著經說及論述史事。或請貳之。弗許。曰。吾以盡吾年耳。已市二甕。下棺則并藏焉。卒年八十有八。親故夙市良材為具棺槨。聞而泣曰。昔先將軍致命危城。無親屬視含斂。雖改葬親身之槨。弗能易也。吾忍乎。趣易棺。乃卒。或曰。書已入壙。或曰。經說

有貳尚存其家。見方苞望溪集。



清 曲園居士纂

孫將軍

孫將軍名守法。字繩武。陝西臨潼人也。家酷貧。廢書務農。然多智謀。膂力絕人。性復任豪俠。喜交游。嘗飲於市。酣醉兀兀。輒撫膺奮歎曰。不掃妖氛。死不休。市人皆大笑。以為狂。時流寇猖獗。將軍仗劍入行伍。為制府洪承疇戍旗健卒。每出。輒敢當先。以單騎擒賊首。點燈子。不沾泥。斬獲甚衆。授守備。又與閩王高迎祥力戰。迎祥棄馬入溝中。將軍亦棄馬逐之。迎祥故壯悍。將軍與之手博。卒生擒以歸。收其軍。餘賊為之氣奪。授叅將。轉升護藩練營副總兵。威望日隆。所向無前。高傑者。號翻山鷄。雄勇有才略。為賊羅汝才副將。將軍知其可用。單騎入傑壘。慰降之。傑感將軍恩。為泣下。以父事焉。歲時必西向拜。誓死報朝廷。後封興平伯。將軍力也。李自成僭號西京。將軍仰天慟哭。棄家保秦世子。以孤軍退守興安之五郎壩。自成招降。將軍數殺來使。豎義旗募兵。約總兵賀真。為恢復計。會我朝定鼎。孟公喬芳督關中。悲其志節。屢以書招將軍。將軍以未得手。刃李賊。抱志不出。慷慨悲歌。有妻子可殺。君父之仇不共戴。

天等語。聞者哀之。尋為土人所害。始將軍鎮長安時。歸葬其父。偕里中父老浴溫泉。解其衣。偏體創癩。幾無完膚。人為將軍泣。將軍意落落也。為人嚴重雄威。而和平坦易。性至孝。篤於友誼。每好與儒者遊。及臨陣遇敵。則猛如虎兕。見者以其面黑。稱曰孫竈君云。用兵如神。善撫士卒。能得人之死力。廣西提督吉公孫略。副總兵孫公麟。皆將軍義兒。湖廣提督胡儂子。瓊州總兵高進庫。皆將軍門下裨將。其他千百夫長。以功名起者。蓋不可勝記也。而將軍竟以抱志死。悲夫。論曰。吾為童子時。聽人言孫將軍戰功忠勇事甚悉。及後讀諸家紀流寇事始末。乃若不知有將軍者。甚矣史傳之缺也。將軍事。今關中人人皆能道之。蓋其出身如狄武襄。敢戰如李英公。而退保深山。孤軍誓死。則又田橫之客也。而泯沒無聞。忠臣之血。千年化碧。可勝慨哉。見康乃心

羊野集

### 陳鷗沙嚴弓父

陳鷗沙先生。名所學。字行之。鷗沙其別號也。家世籍江浦。性耿介。不苟合於人。獨與同學嚴弓父交最善。一切括帖家言。皆弗屑力鑽穴。諸典籍有疑義。必與弓父究極。其指歸。弓父喜為詩。而先生晨夕與倡和。弗輟也。先生故與弓父居浦口城。鼎革後。

則手裂其諸生巾。舉巨榼，榼碎其家具，命奴僕折毀其所居室數十楹，盡以其棟椽瓦  
壁。施道士為東嶽殿，而逃跡於窮鄉數十里地。曰三汊河。編黃茅屋三間，居四十餘  
年而卒。卒時年八十九。有詩數十卷。風調類香山。大率多與弓父倡和之作也。嚴先  
生亦江浦人。名天表。字弓父。其先有明時為黃海衛指揮。先生長子當世襲。乃讓其  
季。而已自為諸生。先生瀟灑絕羈束。諧謔似魏晉間人。陳先生鷗沙居三汊河。而先  
生亦棄城中居。卜築高橋灣。去三汊河五里而近。凡一月。必與鷗沙數數會。會則敬  
啟各涕泣。已而操筆各為詩。鷗沙性不飲。先生則豪飲無休時。間或袒鞢臂。縱酒淋  
漓。而鷗沙則怡然堅坐相對也。嘗得檟材。自製藏榔。凡有得意句。即書而刻之。久之  
榔內外皆滿。年六十餘。嗜酒如故也。一夕。自鷗沙所醉而歸。忽無病而卒。見刻  
巖集

### 華豫原

無錫有奇士。曰華豫原。方歲乙未。撫吳儀封張公。坐事逮。部使者偕制府。即訊於潤  
州。而羈管公城隍廟中。甲而守之。生獬如乳虎。非著門籍。不得輒出入。門生故吏。無  
敢嚮邇者。豫原聞難。自無錫疾馳。一晝夜踰三百里。至京口。唁焉。既抵廟門。不得入。  
而顧見有官人傳呼來。帶弓韃騎而從者數人。至門。門焉者皆卻立。官人下馬入。從

者皆入。豫原則闖然隨之。入數折而達張公請室門外。即又不得入。徘徊往來。所以屬其門者方故萬端。然卒不得入。門者曰。客何為者。始吾以客為從官人來。故不誰何客。乃今知妄男子耳。不去且得罪。制府怒。不可犯也。豫原大笑。應曰。若乃以制府嚇我耶。向令吾惴惴制府者。吾安得至此。且天下事。不可知。往者張公嘗與噶禮訟矣。部使者按事至再。無直張公者。賴天子明聖。張公撫吳自如。而噶禮卒抵罪。今張公雖就逮。萬一上復有後命。如異時事。若等何面目復見張公。言已。索筆大書其爵里姓名。付門者達張公所。曰。可達達之。不可則以此紙上制府言狀。惟制府死生。當是時日漸西夕。而豫原語侵制府益急。門者縮頭。既已無可奈何。則入白守者。而守者亦頗聞餘語。色動。為言於張公。張公命之入。豫原乃入。相勞苦如平生歡。良久乃去。越數日。而部使者之祠報燬矣。初。部使者視學江左。有聲。吳中人士。為祠於江陰。歌舞之。當張公之與噶禮交訟也。部使者按事至吳。吳中自士大夫下。遮馬首以千萬數。願無奪我張公。而部使者頗不直張公。吳中人固怒甚。及是役也。部使者與制府劾張公欺謾不讐。罪且至殊死。吳中人咸涕泣。不知所為。而會豫原自京口來。具言張公就逮良苦。則益洶洶然。顧無所發怒。豫原遂言曰。狄梁公之有祠魏州也。其子景暉

弗類魏州人燬之。不復祠。今日之事。得復有香火情耶。於是衆數千人。奔部使者祠下。爭撤屋瓦投之。以巨牛東西曳。椽棟盡折。或焚燒其餘。呼聲動天。埃起漲數十里。明日。制府聞狀大駭。陰使人廉問主名。疏以去。然竟無如何也。當是時。豫原幾不免。亦以此名聞江淮間。豫原名希閔。著有廣事類賦等書行世。其人斂退就懦。粥粥若無能者。而遇公正。發憤乃若此。上卒不用部使者議。而驛召張公。命以白衣領倉場

職。

見方輿如集  
虛齋古文

曲園居士曰。所云部使者。乃張文端公鵬。翻也。曾以兵部侍郎。視江蘇學政。文端亦一代名臣。而此事不能無遺議云。

### 李復新

孝子李復新者。襄人也。世居城之東村。崇禎十四年。歲饑。復新出糶於郾。土寇賈成倫劫其家。執其父際春殺之。復新歸。痛哭絕。而復甦。裹刀衣縫中。日夜謀所以報父讐者。是時天下大亂。法令不行。控告無所。而成倫强悍。所以防衛甚嚴。復新伺其隙不得。且恐其他奔。即又謬為懦弱。揚言於衆。以示無復讐意。成倫聞之。信以為然。安居如故。國朝定鼎。復新潛之省城。訴於太守。逮問具服。繫成倫於獄。會大赦。減為

徒還襄起解。復新先伏道旁。俟其過。舉大石擊之。中其腦。已死。復連擊之。解者欲羣執之。復新曰。吾報父讐耳。豈畏死者。乃自詣縣。願就死。令憐其孝。不忍寘刑。乃手自為狀。以具白。所以且曰。如復新者。宜表其閭。以旌其孝。到府。太守難之。駁其議曰。賈成倫事在赦前。業已降罪為徒。而李復新斃之。宜如殺人之律。事下。令不能對。縣有掾老不視事。素巧。詳文案牘。一出其手。無能易者。令強起之。乃復議曰。蓋聞父母之讐。不共戴天。古云。殺人者死。未聞復讐者死也。又云。凡報讐者。書於士。殺之無罪。復新固已屢訴矣。且赦罪者一相之仁。復讐者千古之義。成倫之罪。可赦於朝廷。復新之讐。難寬於人子。成倫且欲原赦。而復新不免極刑。平允之論。似不如是。父子何辜。並遭大懼。凡有人心。誰不共憐。伏願貫以無罪。且旌其孝。太守不能難。卒如其議。表其閭曰孝烈。見劉青墓高陽山人集

### 韓晉之

韓廷錫。字晉之。侯官人。幼聰慧。九歲背誦六經。略無舛訛。未弱冠。舉止如老成人。家素貧。投水不給。而臨財毋苟得。膏火不具。而開卷必衣巾。當萬曆季年。補博士弟子員。時習經者。類鹵莽滅裂。晉之必研究終始。條理貫通。又嘗以字學壞於鍾玉。故悉

力於大小篆終身不作行草。雖朋友往來短札無非大小篆也。執親之喪三年未嘗見齒。或親戚情話不能斷絕。則衰麻隨身。親攜草墊。在處據地以坐。識者以為今世之王偉元徐仲車也。少時見其所讀漢書二十六冊。手注與史記異同詳略之處。細加評騭。皆作蠅頭斯籀。朱書日久吐鉛斑剝陸離。可愛可寶。見余句集

### 齊望子

齊莊。字望子。閩縣人。世居齊坑。幼嗜學。家貧不能具膏火。為人夜舂。手足操作。而置書其旁。注視之。春事未嘗不辦也。弱冠以五經領袖童子試。當萬厯季年。閩習漸尚軋茁。至天啟初愈甚。科歲試場中。有諸生自命不作第二人者。搖筆苦吟。改竄輒數行下。旁生問之曰。君文早完。奚為苦改。慮不冠軍耶。曰然。文章早就。看來逐句可解。如何能出人頭地。須臾苦吟改竄如故。旁生復問故。則曰。經改後學。使者不得其解矣。然吾猶能解之。必至於不能自解。方可一不可二也。爾時風氣如此。望子獨原本六經。不稍雜縱橫家語。前後衡文者。莫不以國士相賞。累十數試。輒空其群。從游數百人。往往掇科第而去。旋躋膺仕矣。望子棲遲窮巷。自甘貧賤者三十年。暮年著史論四十卷。自西漢迄於元代。見余句集



鄭澹居

越有隱君子曰鄭澹居先生。高曾祖父奕葉光顯，有聲先朝。先生恂恂儒雅，不啻單素。早棄科舉之學，一意以棲遁為樂。豪於酒，遇飲輒醉。春秋佳日，喜出遊。所至主人觴馬，輒留。未嘗拒。先生工書，吾郡自徐青藤、王謔菴，以書法名海內。先生起而繼之，幾與之埒。求書者踵至，先生皆無所靳。凡士大夫名園甲第，高樓曲榭，必以先生書與琴尊、彝鼎相錯。扉窗几案，醉墨淋漓，獲之若珍寶。故知與不知，咸熟其姓名。嘗隻身游京師，時朝廷開館閣，招四方文學士繕緝秘書。于是四方之士雲集京師，皆思以其技自獻。幸為主者所錄，隆恩異數，幾出制科右。先生苟欲於此時干進，彈指石渠金馬矣。而先生浩然襪被以歸，戚友扣其故，漫應曰：吾不忘紹興家釀耳。嗟乎！非隱君子能若是乎？

見金懋紀東武山房文集

楊安城

安城楊公，故山陰處士也。少喜讀書，任俠。年十七，為諸生。思陵末造，天下多故，慨然有濟世志。與里中高才生及四方豪俊交，名日起。然坐是流離絕域數十年而殁。始公與朱伯虎、吳佩遠、魏雪竇游，奴視齷齪士，士亦莫之敢近。及伯虎死，佩遠入滇，雪



竇為怨家所構稱與張煌言交通罪不宥詞連長興錢允武允武妻貸千金屬公營救書為邏者所獲嚴拷允武索公甚急允武死不承公遣人謂允武曰吾名在牘詎能免我出則君寃自白毋自苦也遂詣獄獄具魏錢坐死公流甯古塔康熙壬寅仲冬也時大雪出塞膚肉凍結耳鼻手指觸物輒墮過混同江入那木色齊喬木夾道蔽日月老根穿裂石罅冰雪灌積馬行輒踣豺虎罔兩白晝嘯呼徹山谷同行者慟哭惴惴不免公獨周覽山川險阨歷書所見作詩歌紀其事不異平日明年仲春抵甯古塔為金元上京會甯府地近冷山五國城距京城三千里矣土人及駐防將士皆樸魯衣魚皮漢人以罪至者多依為生傭使之公至獨為屋以居入山伐木壘土石為炕皆身自擘畫土人初竒公狀貌至是益服其才公稍出漢物與市土人貴漢物爭出菽粟來易遂約漢人共賈菽粟漸饒土人既仰給於賈不敢輕漢人矣公曰未也尚不知禮教於是教之讀書崇退讓躬自養老撫孤贖官奴婢同難蕭山李兼汝蘇州書賈朱方初沐黔國忠顯弟忠禎皆廩焉贖朱大典孫婦劉振英河南李天然及其弟諸生希聲夫婦湖廣衛守備王某皆罪隸也凡貧不能舉火及婚喪者公為倡率周之富人感其義爭助公以不與為耻曰吾不可以見揚長者公居甯古塔數

十年安其俗。嘗奉已將軍檄練水師混同江。禦俄羅斯。移家小烏喇。既而罷歸。性至孝。母喪年餘。訃至哀。毀骨立杜門三年。子賓出塞省公。公年六十八。鬚未半白。善飯步履如飛。燈下能小楷。語至夜分。以為常。賓歸。訟冤闕下。南巡復叩闕。請率妻子代戍。衛士箠之幾斃。卒格不行。公竟歿戍所。年七十。公黑而長。修髯偉幹。娶范氏。公出塞例僉妻行。或請代。范夫人毅然不可。三子賓寶龍。皆夫人出。公歿不得返葬。賓寶泣請兩曹。幾二載。憐而許之。夫人扶柩入關。土漢送者。哭聲填路。公初名春華。出塞更名越。號安城。其所居鄉也。見余懋祀東武山房集。

### 呂尚義

大庾縣呂尚義。世居南源山下。其地在大庾崇義二縣之間。土出肥美。然界連廣東。層巒峻嶺。山有錫礦。礦徒出沒。峒老則亡。為盜賊剽劫。村莊人莫敢居。惟尚義結廬其下。數十年賊莫能害。尚義與妻俱善用鳥槍。發無不中。施放尤敏。十步可放三槍。每遇賊至。夫婦二槍連環不絕。歲殺賊無算。賊恨尚義刺骨。康熙四十年。有廣東萬猴山賊渠藍某。率賊二百餘人。白日持槍礮過大庾嶺。昌言將往南源。殺尚義復仇。南安叅將營兵莫敢阻拒。聞之。贛鎮楊鈞隨遣二守備率兵數百人往捕。比至南源。

則賊已為尚義擊敗竄匿山谷矣。時尚義妻已歿一女亦能用烏槍。父女二人共殺賊五十餘人。其餘匿山谷者。尚未解散。官兵以林深箐密。莫敢搜捕。尚義慨然前行。曰：第隨我來。賊可盡得也。尚義鷹目洞微。見遠茅草中有伏賊。百步外能見之。發槍即中。咸驚起。遂踰山以逸。官兵環視不敢捕。惟得沙礮三位而還。崇義高令尚瑛。召尚義至衙。予酒食。賜銀。欲署為捕頭。大庾令亦欲委之。彼此列狀爭於府。尚義俱謝不受。委曰：吾農民。不願充役。但兩縣官長為安靖地方計。吾所居在兩縣間。何敢辭勞。南源一帶。吾女在。可無事。其餘兩縣地方。但有山賊。吾願隨官兵往捕。賊聞吾至。即逃矣。于是兩令大喜。厚賜而遣之。然廣東礦賊。自是役大創。亦不復至。南安云。見李

緘穆堂  
初稿

### 孝義吳君

晉江吳君。歿二十年。安溪李侍講清植始為之傳。而私謚以孝義。君諱鴻錫。字允康。生七歲。而海寇亂。考諱萬佑。挾以避居浙江。適兵部車駕司郎中滿洲噶公尼布奉命來造戰艦。延君考於幕。數月。君考卒。噶公挈君歸京師。命其家人忠樸者父之。君請呼以叔。曰：父一而已。噶公大奇之。曰：七齡兒能辯此耶。噶公清宦。家漸困。君亦稍

長助任牧芻。精勤勇猛。芻恒有餘。因以易錢。市書冊。弓矢私習之。又市果酒。就能者質焉。數歲。遂通滿漢文。精騎射。一日。噶公閱射。方怒拙射者。君從旁指導。噶公謂汝能耶。汝手弓。君徐進。縱送合法。三發皆中。噶公益竒之。歲癸巳。君從兄雲鱗。以平臺灣功。授温州營參將。引見至京。因就噶公乞之歸。噶公喜。遽諾之。君獨潛然流涕。曰。我未可以歸也。我七歲育於公所。我壯而公老矣。三子始扶攜。安所恃。必俟公子成立。我乃可歸耳。噶公聞言。持君大慟。遂不采行。正紅旗謙郡王之孫。鎮國公海清。噶公婿也。高君義。請隸其公府佐領。俾久居旗下。以成君志。從之。明年。噶公果歿。夫人以哀毀得狂疾。長子和順。甫七歲。次和鼎。六歲。和麟。五歲。族中之豪與隸人悍者。眈眈欲蠶食其家。君信行素孚。文材且武。諭以義。懾以威。咸莫敢如何。家故不及中人。君精心計。權子母贏縮。歲入恒倍。日以饒。延良師課噶公三子。食飲必親饋。業稍進。則頓首謝。師感之。並盡心。又親教三子國書。稍長。並為娶名族女。君尤謹於禮。冠帶終日不急。歲時慶祝。君盛衣冠。率家人入執事。事畢。親率以出。中外翕然。和順年十六。有忌之者。擢為護軍。將困苦之。每番直。君佩刀以從。夜直則露坐。終夕。人莫敢加害。願念非通仕籍。無以免厥役。而噶公故交。無能相援者。惟大學士阿公蘭泰。曾同

任兵部。又以事相失。君獨謂阿公長者。可以義勸。日率三子候公門外。公得其情。果惻然。問諸子習國書乎。曰皆習。孰最優。曰和順。優。公諾。以中書用之。既而首輔索公額圖。欲用其族子。君即為書言和順孤苦狀。伺索公出。跪而上之。索公大怒。擲書去。不顧。君跪其門。五晝夜。水漿不入口。困垂斃。索公大驚。曰。世乃有義烈如子者乎。吾用順矣。順就內閣試。果補錄。乙亥歲。聖祖親征厄魯特。君勉順曰。國家有事。正臣子効命之秋。亦子發跡地也。亟為治裝。請從征。遂從大將軍伯費揚古。由西路進。君結東從行。數日。家中宵小。擾攘遽起。使人追君還。君泣謂順曰。吾不得偕行矣。雖然。死生命也。戰陣無勇。非孝即非忠。子必勉之。怒馬抵家。宵小亡匿。訖無事。而順亦自力矢石間。得功牌二。凱旋議敘。升禮部主事。有約順會飲者。以博具佐觴。政君知其匪人也。拔刀衝座。執其人數曰。飲博非居官所宜。順孤子。汝何得以此誘惑。必殺汝。刀觸席鏗然。其人大呼乞命。叩頭不已。使捧而去之。引順而歸。或問人可殺乎。君正色曰。殺人者不過死耳。吾已許噶公撫諸孤。而坐視其溺於燕朋。誠生不如死。吾死而諸孤加勉。則死賢於生矣。然順自是不復與燕會。癸未。山東大饑。朝廷遣官往賑。和順在行。君曰。此仁人君子盡心時也。從以往。分賑武城。廩未發。君即以私錢市米。因

逐戶稽冊先量給之。念民居有僻遠不能至縣者。度四鄉中地得南魯集為散賑所。又懼民饑久不勝任負。日為蒸餅萬計。人給大餅二。然饑腸驟飽有致斃者。或言先飲蘿蔔湯則無患。亟為湯。蓋日活民無算。事竣歸。武城泣送者數千。有送至京者。歲丁亥。順奉命收密雲關稅。君贊曰。負販小民不可取其稅。倘額不及。以家財足之可也。民大悅。競趨之。額亦敷。鳴公次子和。彙習舉業。遇鄉試。君述先德勸課。涕泗交頤。猶懼其怠。穴其几貫鐵索。自繫以守之。彙驚謝。請脫繫。不許。讀益力。遂中式。以微誤。抑置副榜。君弗嫌。為送例律館任校錄。彙弟和麟。年十六。君即攜赴永定河効力。為通籍資。河故名無定河。水怒土疏。潰壞無常。君為親督畚掘。隄成而水驟漲。君晝夜守視。增卑培薄。直隸巡撫于公成龍。夜出視隄。遙見有拜於隄上。泣籲河神者。召詢之。則君也。于公歎異。脫襲衣贈之。是歲隄壞者多。麟所占獨不壞。以功議敘。補筆帖式。蓋鳴公三子皆賢。而君所以成之者為尤力。君卒。三子去纓席地。婦皆披髮去璫。如居父母喪。葬之日。皆徒步扶柩至塋。蓋君所以感之者深矣。初君以噶公育己恩。矢扶其孤。不得歸。念父母邱墓。南望輒隕涕。募良工追寫父母像。遇忌辰及歲時。伏臘。率妻子泣奠。竟日。檢篋得厥考遺衣冠。就噶公墓相近地。招魂葬之。寒食拜掃。盡

哀每歲除。尤嚴餽奠。終夕欷歔徘徊。厥考及嚙公兩墓間。達旦始返。或謂屠蘇辛盤。君不歸。家人何以安。則泫然曰。吾少孤。不逮養。義不當受家人之養也。年五十有八。長子世久。仕至王府親軍校。次常德。丁未科進士。見李紱穆堂稿。

### 盧必陞

浙之東有盧孝子焉。諱必陞。字采臣。號玉若。世居姚江。後遷山陰。祖諱極。生子五人。長諱芳。字南江。孝子之本生父也。次諱茂。字懷江。無子。以孝子嗣焉。孝子始生時。祖母張太君病甚。本生母朱孺人禱天自代。是夕夢神益奠。并賜汝孫。及覺而生孝子。少時知孝敬。有異敏。嘗從學舍歸。懷江公以新學生屬對。即應聲曰。古君子。懷江公大奇之。九歲。南江公病。思得螿蜚。孝子潛攜一筐。採沙口。為風潮所沒。得漁者。救以竹筏。筐終不釋手。而螿蜚滿盃。甲申之難。流賊未殄。懷江公負俠氣。常仗劍獨行。不知所往。孝子聞。即奔覓諸暨山中。晝循林箐。隱夜則崎嶇匍匐而行。失道投僻路。伏屍枕藉。驚蹶疾奔。兩足為沙石所嚙。血縷縷漬地。行跡皆血。遇一山僧憐之。挾與俱。遇虎匿高樹。大呼山神救我。虎竟去。閱數日。得奉父以歸。壬子土寇竊發。懷江公陷賊營。孝子匍匐探其穴。贖以金。不應。繞岸哭。三晝夜不絕聲。賊感動。為引至父前。



時賊首毛袁二人欲得懷江公降。脇以刃。不從。斬所俘者以示。又不從。賊怒。拔刀環向。刀欲下數次。孝子冒刃。叩頭血流。大呼丐命。忽狂風四起。大雨如注。舟幾覆。凶黨震駭。乃得釋。時賊中有倪姓者。因而歎曰。真孝子也。乘間逸之。孝子既奉父生還。逆知賊必追己。遣人馳報張太君。盡室以行。明旦賊果追之。不及。縱火而去。先是孝子為繼時。懷江公有女。忌分其貲。百計傾之。孝子處之泰然。至是奉徐孺人命。往雲間。舟過石門。盜擊之。垂死。盜曰。爾死毋我讐。我奉某命來也。孝子佯死。盜縛而投之水。遇富陽支姓者。救之得免。人或勸之訟於官。孝子泣曰。吾自出繼以來。蒙吾母恩育。十有餘年。且母只此一女。故不忍以女故傷母心。上書徐孺人前。自謝不謹。被盜不及他。徐孺人亟召之歸。母子相孝愛如初。雍正二年。浙江巡撫李公。請旌於朝。見蔡世遠

二希  
堂集

### 王獻我

王公名策。字獻我。順天霸州文安縣人。父應霖。明萬曆庚辰進士。官至湖廣參政。應霖弟應期。萬曆乙丑進士。官至刑部郎中。策舉萬曆庚子鄉試。為山西太谷令。有惠政。罷官里居。崇禎戊寅。本朝兵圍文安。人知城必陷。紛紛各以其孥出。公獨毅然曰。

同為王臣。里居何殊。官次棄城。倡逃可乎。諭子孫家人。有走匿者。不忠不孝。辱吾莫大焉。舉家惴惴。知必死。凜公言。莫或貳。城陷。公朝服坐廳事中。兵入。厲聲罵。遂遇害。妻妾子孫男女僕婢。大小近百口。無一免者。公三子。長層城。次礪燕。三添下。層城添丁。從公死。礪燕先亡。婦郭氏。釐居雄縣。光祿卿存謙女也。光祿憐愛女甚。城危時。知公剛執難辭。說令其子潛迎女。不告公。縋城去。公既知。怒甚。遽為書絕之。縋送郭曰。吾家誓不留此。臨難苟免之婦也。兵退。郭氏歸。徹後廳材。為三十餘椀。以斂葬焉。如貧守志三十餘年。以壽終。見徐用錫圭美堂集。

### 謝隱君

隱君姓謝氏。名辨。字爾翼。號恕園。浙之會稽人。幼負大志。年十六。補博士弟子員。遭時鼎革。甲申乙酉間。所在蠶起。浙東山寇。以白巾裹首。號白頭兵。焚掠諸暨。嵎縣等處。隱君廉得其可破狀。糾合鄉勇。夜渡七沙河灘。擊潰其衆。所獲輜重。盡散里人。是年為丙戌。隱君甫十九。以孤童子。率一旅之師。用計智克敵。由是知名。明年王師南下。徵隱君至軍。參振武軍事。督武林諸道糧餉。強而後行。事竣論功。擬授殊職。隱君辭不就。浙閩總督姚公啟聖。與隱君少同里閭。以意氣相友善。後開府福州。帥師駐

廈門進討台灣。遣使迎隱君。隱君為悉心贊畫。澎湖既克。姚公欲以名上聞。隱君笑而謝之曰。吾覬得官耶。當督餉東南時。富貴可早致矣。本欲故人成不世功。故輕數千里而來。豈故人知公。公不知故人也。及姚公歿。隱君哭之慟。悼世無知己云。家素豐厚。急人之難。無少顧惜。嘗言吾為友三破家。令其人皆將相矣。問其姓名。終不答。其高義類如此。戊午。自京師徙居江甯。己巳。再遷江都。因占籍焉。而桑梓之思日切。每語子弟。吾邱墓在越。願爾輩終為越人也。工吟咏。六十以後。雅不欲與人間事。惟日哦不絕口。凡其有所紀於外。有所動於中。悉著於篇。辛卯冬。一取而焚之。存者僅二三百首。閒適之作而已。後目昏。不能視日。命諸孫誦有明一代之作。據案莊聽。欣然而喜。愀然而悲。家人莫能測也。善草書。入懷素之室。所著有尺牘鈔四十卷。中朝疏稿二十卷。甲乙新聞五卷。素無疾。庚子七月。一病不復起。戒子孫曰。聖朝重遺老。他日吾墓道上。書賜粟老人足矣。年九十有三。

見唐紹祖  
改堂文鈔。

### 李永昌

吳三桂叛滇中。東南騷動。江右界在兩湖閩越間。三面鄰賊。李將軍名永昌。號鳳山。奉新人。以從譚固山收江西。起行間。積功至把總。甲寅。檄守南豐。五月。閩賊犯城。將

軍鼓勵士卒。同長子世芳。三子名芳。奮勇出戰。自初八至十四。轉戰七晝夜。斬賊四百餘級。乘勝追逐至沙洲。近賊巢。將軍所將百餘人。酣戰分擊。所向披靡。賊衆數千。從林谷中猝出。撞塘衝擊。我軍不得合。名芳以馬陷污田中。為賊所害。將軍戰益力。絃絕矢盡。猶手刃數十人。乃顧謂其下曰。事無可為。吾惟以死報國耳。遂遇害。世芳將數騎。從間道突圍出。尋父弟不得。而將軍戰馬忽從賊中歸。哀鳴躑躅。若有所訴。而後知將軍殉焉。後三日。購屍以斂。猶握刀甚固。英氣凜然。見者咸哀之。奉旨贈永昌參將。名芳都司僉書。見帥我墨  
瀾亭集

### 慶州老人

慶州老人武平字。不知其真氏名。年七十餘矣。康熙戊午。後來福州。寓居余西園東偏。嘗步臨池上。與子兄弟游。為予誦尚書禹貢甚熟。自言弱冠為慶陽諸生。任俠好酒。嘗因醉殺所愛妓。因亡命為賊。時天啟六七年也。又言闖獻皆後起。闖獻盛時。已革心歸明。宏光後。隸興平伯高傑軍中。腰玉矣。本朝兵南下。遂遁跡入河南。入粵。其門下人從新朝。往往有至藩臬都帥者。語未竟。泣數行下。自是數來書室。輒繙吳蔡酒梅邨所著綬冠紀略。案其語。日月不失尺寸。如孫督師傳庭出闕。敗師狀。及四鎮

爭揚州時事。所語尤詳。其貌不踰中人。平居恂恂。不妄發一語。不知其為武人者。遇有所感觸。輒奮袖起舞。意氣激昂。顧影自詫。謂尚可一用。燈炮話寂。則兩淚龍鍾。問之。復不肯自道也。丁卯冬。將送其女於汀州。與予兄弟來道別。云此去。將與君永訣矣。平生一腔熱血。今灰心矣。亟挽問其姓名。堅不肯。應曰。吾子尚不知。君勿復問也。明年果卒於汀州。

見林信樸  
學齋集

### 沈貞孝先生

貞孝先生者。沈留耕先生之私謚也。先生諱澈。字亦清。晚廬留耕草堂。又號留耕。本生父諱麗。本生妣潘氏。嗣父諱鈴。早卒。母姚氏。以節孝旌。先生少失恃。本生父不甚愛憐之。童時常從父至會城。城中肩摩轂擊。不能辨路歧。誤走入旗下。旗下人留以為子。遇之厚。已而欲妻以女。先生以未奉父命。固辭不得。遂潛歸。是時。本生父欲為弟鈴立後。思先生方亟。節孝亦賢。先生歸。為之娶於董而立之。先生偕董孺人。事節孝。朝夕惟謹。節孝愛之若己出。時有節孝戚某代理家事。忌先生得母心。思間之。然節孝素嚴。所居有銅牆鐵壁之謠。雖至戚不得常見。會節孝病。與婢阿都謀所以間先生者。以節孝管鑰。付先生。先生故質直。為母病固當代母勞。遂不辭。某因讒之曰。

姊以為澈孝乎。殆甚利若死耳。節孝驚問狀。乃婢與同詞。以執管對。節孝怒。命先生夫婦出居外屏。不與見。先生自傷。幼失愛於本生父。至是人失嗣。母歡憂懼。不知所出。每中夜呼天。願減年以益母。又徒行數百里。禱九蓮華山。一步一膜拜。足以重爾已。而母漸愈。初母病時。先生雖屏居外舍。日往節孝所候安否。不得已私問婢。婢所對。率不實。至是聞母愈。而未敢信也。會母欲檢點奩中物。先生竊喜曰。母能檢。母果起矣。然以前曾代持管鑰。中戚與婢譏。節孝疑終不解。一夕大風。節孝方獨坐。忽有呼母聲。入耳甚悲。節孝心動曰。何其聲之似澈也。驚問婢。詭曰。弗聞。先是數聞是聲。亦數問婢。婢輒如是對。至是心意其為先生也。婢復對如初。因恍然悟婢之詐。而先生無罪也。此婢立召先生。先生至。淚猶汪然。跪節孝膝前。痛哭不止。節孝亦哭。責問阿都。阿都具白前事。則皆戚某利節孝所有。誑娶阿都為小妻。而為之用也。遂為母子如初。然節孝自是默默不自得。未幾董孺人病亡。節孝益不快。舊疾復作。節孝知病不可為。而先生未舉子。即命先生續娶陳氏。數月而節孝卒。先生痛哭。幾絕。而蘇。未期。即營窆於里之棲軍堯。親負土。為傭者。先奉嗣父之喪。合葬焉。去墓數十步。有丙舍。曰留耕草堂。先生即廬於是。墓旁有田數弓。著麻衣。荷耒躬耕以祭。既終喪。

而先生亦病矣。蓋嘔血若膿者及百日而卒。年四十一。孤子樹德。未及三歲。後二十  
年。乃克葬。是歲陳孺人與姑姚同表門閭。稱雙節云。見楊魁武古柏軒集

### 楊氏雙孝

楊氏有孝子。曰有貞。孝婦曰唐氏。有貞。名士選。蘇州吳縣人。唐即有貞婦也。有貞六  
歲入塾。塾師講古孝行事。同舍兒多倦聽。有貞獨詰問原委。並為人解說。見者異之。  
或啖以果餌。必攜歸餉母。母嘗暑夜課績。有貞手扇驅蚊。仍口講所業。人咸謂是兒  
孝穎性然也。父公瑞。故業儒。家中落。乃謀治生。行賈中州。屢耗其貲。不得歸。鬱鬱致  
病。病且殆。有貞年甫十六。獨行省父。道經長江。風雨暴至。白日為晦。鄰舟覆者數矣。  
有貞泣禱曰。某數應死。但願一見父。扶歸故里。死無所恨。禱畢。風漸微。雨亦漸止。舟  
竟得全。人呼為孝子舟。時父病日久。家耗隔絕。自分無生還期。忽夢人告曰。若有孝  
子。行且至矣。當即歸無恙已。而有貞果至。父驚喜過望。病頓愈。有貞遂奉父歸。而身  
代父勞。出經營四方。從此家漸裕。父有所欲。雖遠必致。嘗思食龍眼。時遷居下堡。去  
城遠。而洞庭東山稍近。因渡太湖。覓之中流。遇風。同舟數人皆落水中。適有救生船  
至。數人者為風浪衝激。不知所之。獨有貞得救。人謂此亦孝感所致也。唐氏相有貞。



事舅姑初有貞家貧脫簪珥佐朝夕。復遇歲歉身食糠粃而甘旨不缺。隆冬寒甚以針指所得置棉衣四。父子姑媳各衣以一。氏謂有貞曰。舅姑年老非重棉不能禦寒。吾與君尚壯可忍耐也。因解衣衣姑。有貞亦解其衣。夫夫婦俱單衣卒歲。卒無悔恨。姑多病常沈迷牀蓐間。一日雨甚雷電繞屋不止。氏跪階前禱曰。氏果有罪不敢逃死。但勿驚吾姑。已而雷止雨收。姑忽起曰。媳安在。吾病行愈矣。姑後病疽醫者咸謂不治。氏抱姑大慟。親以口吮之。出膿血數盃。明日醫來曰。毒已盡去。今可治矣。數日而姑愈。聞者以為奇孝。古未有也。居喪哭泣盡哀。目腫出血。歲時祭享。夫婦盡志。淚下露衣。年老不衰。人以此稱為雙孝。見楊越武古柏軒集。

### 東氏三節

三節者何。東氏三節也。東氏者何。河南光山縣人也。光山縣人何以祀於通海。東氏有婦曰盧氏。死於通海也。盧何以死於通海。以其舅東旭謫戍通海也。旭何以謫戍。以官御史也。官御史而謫戍。其以言得罪歟。其非以言得罪歟。不可得而知。而考其時。則當有明洪武年。旭謫通海。遂死通海歟。非也。死於中途也。死於中途。盧何以死通海。旭既死。有司起其家以續戍也。起其家以續戍。於是旭之妻。旭之子。旭之女。

無一免焉者矣。東欽者旭之子也。為光山縣生員。率妻及妹奉母以行。未至戍而亦中途死者。其母也。既至戍而謫海外者。其妹也。未幾而欽亦死焉。欽之死以戍兵調征和泥。歿於陣也。于是乎東氏所遺。惟欽妻子然一身矣。其妻痛一門喪亡俱盡。子身無子女。日夜號痛。誓守節終身。以奉東氏祀。困苦窮阨。衣食常不給。然志彌堅也。俄而某姓者。謀欲聘之。欽妻峻拒之。言者不已。遂縊於室。鄰寃而救之。得甦。遂不食。鄰婦勸之。屢日。氣稍平。某姓又強致聘。具欽妻棄其物門外。拊膺大慟。仆地欲絕。復不食者三日。適欽妹自海外來。勸使從己。避於其家。欽妻許之。行及海畔。令欽妹先行。度相距遠。遂躍入水中。欽妹急還救之。則死也。即盧氏也。死之日。洪武辛未七月二十八日也。嘉靖丙戌歲。立祠于湖上。盧氏之死也。以念夫也。欽之死也。以代父也。旭之死也。以承君也。婦以夫死。烈也。子以父死。孝也。臣以君死。忠也。三者天下之大節也。而萃于東氏一門。于是願其門曰。東氏三節云。見趙城集。

清 曲園居士纂

曲阜顏氏事

曲阜顏檢討光燾海內所稱學山先生者也。光燾同母兄弟三人，伯光猷，由翰林出為安順府知府，稍遷河東鹽法道。光敏由中書為吏部考功員外郎，父某，母朱氏，魯藩近屬也。明崇禎十五年冬，我師入內地，郡縣失守，時光燾祖賡明以河間太守，闔署自焚，家人呂某從烈燄中抱主少子逃匿，後為壽州通判。光燾父聞亂，急省親河間，我師已下兗州，道梗不得前，父踰城傷足為邏者所及，見偉幹修髯，不忍殺，詰所藏以實告，即共與至家發藏，果然。旗長知為亞聖裔，乃大驚曰：「二等聖人，後固如此，其不敗乎？」遂詢一家老幼所在，答以親守巖疆，妻子逃散，生死皆不可知。旗長始言河間守已焚死，或言近郊一少婦不肯入伍，被斫，父曰：「此必吾婦也。」往視，猶未殊，急裹創載歸，則又驚曰：「二等聖人家，男女盡如此節烈乎？」已而圍解，呂奉主少子歸，獨不知光敏所在。光敏甫二歲，孫嫗抱走，被擄，嫗固黑而有力，汲水負芻糗，兼二男之力，營中利賴之，不殺其兒，或更相盪抱，至關外始得間脫走，距兗州百餘里。嫗一日

盡氣奔回。則巷無居人。蟻蛸在戶。以為主家已喪亡。倚牆悲哭不能止。曰：吾重跡至此。祇為顏氏一塊肉。今安所置之乎。良久得一人。告以顏氏已歸曲阜矣。此空宅也。嫗聞收淚遽起。時日將暝。嫗又狂走三十里。抵曲阜。顏父在庭。嫗無所見。直入內室。以光敏置朱氏懷中。曰：還主嬰兒。拍地大笑不止。朱曰：汝顛耶。嫗笑既久。乃徐言亂離後情事甚悉。朱曰：自今以後。嫗永子之可也。後光敏得官。常迎養嫗。逮嫗死。為持喪三日。光猷光黻皆先母十年死。朱氏享年九十。一日沐浴冠帶。與家人訣曰：吾可逝矣。端坐而暝。朱夫人族某遭亂散走。婢張氏抱嫡子流離旁郡。行傭不給。一巨室以朱氏子為嗣。已用巨室籍為諸生。會今上初載。下寬大之詔。俾先朝苗裔得復本姓。歸其田廬。張氏乃為朱氏子泣言所以。朱氏子既復姓。乃置酒召耆老及諸所與游者言。欲為張氏加冠事之如母。張氏艱然曰：吾朱氏之不成妾也。今主君主婦何在。而吾敢乘時竊位。吾以姐始。亦以姐終。願勿復言。見張符驥依歸草。

### 郭海若

先生姓郭氏。諱允觀。海若其字。山陽縣學生。少持重。跬步不苟。學者皆尊事之。游其門者數百人。閩都御史子弗闕於教訓。都御史弗能禁。先生以歲首謁文廟。遭闕子於

途衣婦人衣怒褫之。予杖二十。且曰：閻氏子非吾徒也。都御史踵門固請。乃羈縻之。蓋見絕於先生之門。懼鄉里終身以為貶議。其言規行矩。風度凝遠者。不問而知為先生弟子也。鄰災延燒數十家。先生親殯在堂。卒不得動。火及門。先生號泣徬徨。闔門伏棺上。欲與親骨俱燼。四圍盡熱。而先生居舍。歸然獨存。令表其廬曰：孝子之門。海州一老先生。與先生同姓。避亂攜妻僑山陽。有子八齡。而同姓病困。妻苦啼。慮無以送死存孤。同姓曰：聞此間有郭海若先生。義士也。亟請以往。則言身後欲以累公。先生深念久之。曰：公所託不敢辭。然當歸謀所以安公妻者。乃惟命耳。遂去。旦夕復往。謂同姓曰：公可以瞑目矣。吾聞舍旁一室。以閒置公妾。雖盛夏不得出。吾令人穴其窗。度可饋食。兼有一老嫗與起居。公八歲兒。吾教之。不令絕公讀書種子。其區區衾斂更不足為公憂。同姓遂瞑。先生殯葬之。成禮。迎其寡婦孤兒於家。館餼之久。不厭。孤兒年十八。補海州學宮弟子。於是同姓妾閒置已十年。先生乃破戶出之。俾與俱去。且曰：吾幸不負若翁垂絕之託。吾家貧。本不足以贍若母子。顧義不得辭耳。今若長宜自供母。而歸守先人廬墓。吾又為若營館穀。不憂無以為生也。同姓子與其母感泣。乃謝去。先生行誼卓卓。可稱道。多此類。

見張符驥  
依歸草。

咸默

咸參軍名默。字大咸。山陽縣人也。少補諸生。負氣節。用邊才薦。為左懋第參軍。先是崇禎末。懋第奉使察核。左良玉軍未報命。而北京陷。宏光襲位。懋第請往哭寢園。通盟好。默以執事從。既至燕。懋第辭氣不撓。因留不遣。江南尋入版圖。所在嚴薙髮令。懋第從事副將艾大選。率先應詔。懋第怒答之。大選愧憤自殺。懋第遂論死。棄市。司務陳用極遊擊王一斌。都司張良佐。王廷佐。守備劉統。皆同日就刑。于時默慷慨流涕曰。不有死者。何以報國。不有生者。何以報公。乃負懋第骸骨。葬之萊陽。又歸。葬用極於崑山。皆哭之成禮。一斌以下四人。為埋屍燕山。潛識之。默既沒。人莫知其處。晚託業青烏。芒屨所至。人有識之者。曰。故參軍辛巳秋始識。默于淮陰。讀所作哭萊陽詩。以為此皋羽之徒也。相與抵掌。易代時事。默言南中爭王之明時。已親在燕都。知烈皇之無嗣。亦已決矣。而廟算之巧。欲渙敵國之人心。故與之以成方。遂使自為瑕釁。而奸臣不察區區。用雋不疑之故智。何其愚也。又言三百年之天下。時文壞之。嗚呼。豈不然乎。

見張符驥  
依歸草。

滄浪水樵

滄浪水樵者逸其名。父為隆武顯官。與鄭芝龍不協。仰藥死。水樵傷父死國事。易代後。不求聞達。惟以名山水自娛。五岳四瀆。遊蹤幾徧。貝勒初定七閩。下教錄用。故明大臣子弟。水樵不出。則使索之山中。水樵蓬首披麻。出見使者曰。哀哉天乎。奈何。僕然哀經之中。而覩顏衣錦臨民者乎。使者感動。終喪後。屢辟不起。或徵其辭。水樵慷慨出涕曰。吾極知興朝用人不次。無論憑藉先人餘蔭。足以坐致通顯。即令某提三寸管。與諸少年角。亦未必不博一第。今已矣。自吾考逆溯而上。世為亡國師。保受恩深重。非他族比也。已矣。長為農夫以沒世矣。生子不令就試。但知書識字。諳於大義而已。海甯張子聞而高之。欲邀與語。水樵轟然鼓柁滄浪而去。或曰。此前孝廉興化

李季子也。

見張符噴  
依歸草。

### 高查客

高君不騫。字查客。世稱小湖先生。松江華亭人。仁皇帝南巡。至松江。詔求名士。可備顧問者。提帥張侯雲翼以君對。以布衣召試。行在稱旨。是日閱射畢。命獻詩及駢體序。日已曠。不創稿。立成。經進。大悅。賜帑銀百兩。又命張侯贍其家。俾扈從入都。既至。賜第西華門。供奉內廷。偕翰詹諸臣纂書南薰殿。累朝祕書。多貯皇史。成人莫至。命君



乘厩馬入歲檢書。御衣御書御硯。內府珍味。賜賚與諸臣。班紀恩詩。屢奏。未嘗不稱善也。如是者九年。上以君効力久。欲予翰林官。諭掌院事。揆學士敘。有現缺。以高不騫補授。時中允缺。官當補。而事闌銓曹。不下。君亦退讓。不願躡取。通顯。遂授翰林院侍詔。兼三朝國史館收掌官。纂書如故。君乞旨。敕所司。引行釋褐禮。許之。人以為榮。居官二年。因乞假葬母。遂予假歸里。不復出。幼多疾。十三始識字。十五畢四書。五經通其義。不屑習舉子業。著述程古作者。挾詩文遊吳越間。朱檢討夔尊。高學士士奇。咸推轂君。太史何焯。張大受。輩交莫逆。所至文壇。駭幟傾其坐。人然不求聞達。自署尊鄉釣師。以見志。是故行年將五十。而後受知天子也。及其歸也。年及耆矣。園廬數椽。從深竹間入。俯臨荷池數畝。敗壁頽垣。圖書充積。左右蕭然自得也。問字求詩筆。書翰者。限幾穿。肆應習霍。茂不滿志去。亦以是給朝夕。與縉紳文學。說古今典禮。據經援史。紛紛不已。大吏蒞斯土。及四方使軺至者。恒造廬。君必延見。精力健王。善劇談。騎從饑疲。徒倚。窺賓主。方促膝抵掌。民事損益。邦邑利弊。留連未能別也。林下二十九年。如是者以為常。娶徐氏。生二子。俱前卒。六十四。側室生子羽翼。府學生。八十七。生子為人。後八十四。生子木李。君教子。以窮經博古。勿專尚舉業。羽翼十六始冠。行

筮日醮客之禮近代未聞也。君食椒而壽。冬至後無病卒。年八十七。所著商榷集。羅裙草傳。天集。松圩書屋集。晚歲為詩。尤典奧。必自注釋來處。見黃之雋唐堂集。

### 楊藝

臨桂楊義士。名藝。行二字。碩父福王時。廣西巡撫瞿式耜客也。少年落魄。任譫言人。休咎頗中。動無所忌諱。幕中人稱其痴。藝因自號楊二痴。終已不合去。順治六年春。定南壯武王孔有德帥師入湘潭。執何騰蛟。傳檄至粵。粵人懼。時式耜以閣臣留守桂林。而張同敞督師以禦我。七年十一月。王破永及全。直抵靈川。入嚴關。諸偽將遠遁。同敞乃乘夜獨泗灘江入桂林。見式耜相對泣相誓以死。王既下會城。執瞿張令降。不從。幽之月餘。而後殺諸市。式耜被執時。家屬匿藝所。事發。並執藝。藝不屈。王義而釋之。式耜死。藝服哀經。懸絨錢滿衣。行憲宰有聲。號哭營市間。見纓弁袴。雖短後衣者。輒叩頭。請言於王。收斂主人王聞之曰。瞿某有客。義若此乎。并同敞屍許之。遂得葬。時有釋性因者。永明王時給事中。金堡也。謫戍不赴。為浮屠於桂之茅坪庵。亦上書定南王。言收斂瞿張事。其略曰。古之成大業者。必表揚忠節。殺其身而愛敬之。若唐高祖之於堯君素。周世宗之於劉仁贍。元世祖之祭文天祥。明太祖之祠福壽。是

也。衰國之忠臣。與開國之功臣。皆受命於天。以分任乾坤之事。天下無功臣。則世道不平。天下無忠臣。則人心不正。事雖殊軌。道實同源。王既殺兩人。則忠臣之忠。見功臣之功。亦見矣。抑又王見德之時也。夫殺兩人於生。王所以為功於本朝。禮兩人於死。王所以為德於天下萬世也。請具衣冠。為兩人斂。并擇付親知。歸葬故里。則王播仁義之譽於無窮矣。侍者詣府將投書。遇藝。知己得請。遂不上。後以其書貽瞿氏。式相子。梓其書以行。而不及藝。由是楚粵間。但知性因文字有九。而藝泯泯也。堡後徙粵東。更名令釋。號澹歸。有集百餘卷。其言藝事甚詳。且曰。以吾書掩藝功。吾為竊名。瞿氏子為負德。或曰。藝式相同邑人。

見黃之雋  
唐堂集

### 王默城

王君諱之麟。字對揚。默城。其號常熟人。庚子舉於京兆。雍正六年。揀選知縣。君願改教職。遂補淮安府安東縣學教諭。明年淮屬大水。上臺檄君分查安東飢戶。時一望瀰漫。君乘小舟行田中。舟膠。乘馬。馬蹶。乃騎牛。衣履濡塗。徧歷村戶。得飢民二萬餘口。以報縣令。令愕。貽曰。君所查一隅耳。多若此。如合縣何。請減之。君曰。吾所日擊。皆旦夕死。孰當賑。孰當死。不知所減。爭不得。馳訴於府。府難之。適布政使白公按行至。

君痛哭陳所查災民寒餒待斃狀力懇全賑白公心動許之旋委君俵賑時無穀以銀代君計銀經胥吏手災民十不得五矣乃按戶口親自核析為萬餘封三日夜始竟目眶盡赤是時飢民洶洶縣令出賑裂其輿丞往脫其鬚君至則老稚歡呼曰活我者師爺也於是他所未經君勘者胥怨當事因并檄君覆查自東邑及鄰境凡十八處復得應賑者數萬戶當事重君悉如所報全活甚衆乾隆二年秋邑復被水君奉委查賑自八月至十月冒風雨霜露跋涉沮洳泥濘間無晷刻息者自十一月嚴寒疾疫方作君感之卒病僵賑饑廠中星夜輦歸遂不起

見沈起元  
敬亭集

### 顧玉停

顧陳塋字玉停號賓陽子太倉州鎮洋人乙酉舉於鄉康熙間以薦入湛凝齋纂修六壬易課律數淵源中和樂府諸書書成議敘補行人司行人君資稟超卓讀書必詣微多冥契創獲不主故說為詩詞數百言立就逸趣全溢然以為戲其傑構必窮日晷力追古人而後止詎諧跌宕善談言於義理精奧是非疑似以單詞剖砉然洞然聞者頤解心折遇所不可持論蘄蘄責育不能奪乙酉計偕入都常客相國西田公所公以國士目之癸巳萬壽加科春鄉秋會常熟嚴僕少虞惇典湖北鄉試君故交

也。邀君任闈事畢。而嚴公病劇。執公手。欲有託。君許以送喪歸里。嚴額謝而瞑。君經紀其喪。弔者至為之拜賓。送柩東下。中道。嚴公長子至。或謂嚴公子來。君從此入都。尚及秋試。君曰。吾已許嚴公矣。可食言乎。卒送抵家。遂不會試。輦下公卿聞之。益以是重君。安溪李公。虞山蔣公。爭欲羅致門下。君不可。在湛凝齋也。所纂修皆出君手。每書上。聖祖必嘉獎。屢得溫旨。總裁於是契君。禮遇出同館右。時總裁館事者。皆藩邸也。邸貴重。館中人惴惴將事。承意恐後。君氣和而守介。非館事。邸有所委。輒不應。廩餼外。邸有所贈。同館皆受。君獨辭。某邸有著作。必屬君點定。一日。盡駁其稿。邸怒。擲稿於地。君徐拾起曰。王何怒為。去取在王。邸復詰畢竟誰是。則曰。陳埴說較長。既退。眾為握汗。同館方學士苞曰。君奈何將虎鬚。君曰。吾所守者。是非之正。守正無罪。阿則罪矣。明日。邸卒從君說。愈推重。稱為顧夫子。未幾。賜第京師。飭官津送封公。來京就養。封公至。君方在熱河。聖祖遣官護君回京。省視。諸異數皆邸轉奏之力也。然竟不得一第。每榜前。胥謂顧玉停作會元。乃稱。及榜發。主試者以不得顧玉停為恨。及第者亦憾。榜無顧子。及就館職。議敘以去。諸邸咸惜之。而君顧不以介意。為行人。頌詔於浙。浙撫方監臨。鄉試移文欲止詔書境外。以俟撤棘。君移覆。接詔重於監臨。且

非內簾比。使臣不敢宿。君言於荒郊也。撫軍遽出迎。詔人謂君得使臣體。性至孝。先居母喪。不飲酒食肉。不內寢。麻衣草履。未嘗一日去身。未俗。吳喪衣墨。見君衣如雪。婦豈嗟歎。目為真孝廉。自行人假歸。侍奉封公益謹。家故貧。間出負米。不踰百里。復不踰一旬。乾隆元年。詔起官。辭弗應。尋詔中外舉博學鴻詞。顧公琮巡撫江蘇。欲以君應。君力辭。而王宮詹奕清。已以名聞。部檄敦迫。竟以親老辭。封公歿。君年已六十有三。哀毀一如居母喪。余時官河南。欲延主大梁書院講席。援范文正公憂中掌學。睢陽故事以勸。君執象山責呂東萊故事。堅謝不赴。少讀皇極經世書。至無口過易。無身過難。無身過易。無心過難。四語憬然汗下。後讀參同契。首楞嚴。謂性命之精。在此二書。實一貫也。手自箋注。晚讀象山集。掩卷歎曰。先生之學。以躬行實踐為主。謂其近禪者。妄也。自命為象山後人。有以程朱之學諷之者。君亦無所逆。然所心得。所服膺。則在是。君生平絕學有三。曰字學。曰算學。曰樂律。嘗造八矢。注字圖說。謂字學居六藝之末。聲音樂也。形體書也。而口出耳入。手運目存。則皆有數焉。惠學士士奇。孫通政勳。得其書。置酒延君。請其說。君為言經聲緯音開發收閉之旨。及每矢實義。一矢未發。則聲不能出。字有所避。八矢盡而音定。字死矣。二公歎為天授。在湛凝齋。外

廷送算學三百餘員候試。主者令君與試。聖祖親策之。得七十二人。君為冠。內廷呼為算狀元。君於字學算學。溯流窮源。遂通樂律。兼精醫術。所著有洗桐集九卷。抱桐集三卷。八矢注字圖說一卷。鍾律陳數旋宮知義各一卷。無益之言一卷。讀四書偶見三卷。讀內則一卷。內則音釋一卷。合注龍虎上經參同契二卷。注首楞嚴五卷。癸巳治疫記三卷。見沈起元敬亭集。

邱天民

滕縣令邱君天民。字次衡。襄陽宜城人。雍正八年。選拔入貢。故事。貢入太學。次補教職。世宗不次求才。特詔天下貢士。廷試後。引見。拔其尤。以知縣用。君得與選。發往山東試用。初攝霑化。坐事被劾。後河東制府王公薦。復起攝鄒平。旋調陽信。時有老瓜賊。出沒山東河東直隸間。為行旅患。老瓜賊者。專伺孤客。一賊昵客。同止宿。誑客早行。餘賊為坎道旁。俟客至。蜂出縊客。破其腹。裸而埋諸坎。攜贓以逸。慘毒甚於他盜。而地無屍迹。死者家不得死所。無可控。賊不巢聚。捕治不即得。乾隆五年。巡撫朱公奉。上諭嚴緝。擇幹吏八人責之。君與焉。半載後。君訪得賊首楊姓。誘之至。其人魁岸駢脇。年五十餘。能數人敵。庭詰之。無懼色。君念事無左證。不可以刑。好言語之。潛令人



取其家所藏贓物示之色微沮卒不吐復飲之酒至五斗賊大呼曰今日願就死耳具吐平日殺人狀及年月日殺者姓名瘞屍所同黨某某漏盡四鼓盡得實翼日飛檄分捕同黨盡獲三省謀殺五十餘獄皆具得所埋屍二十六撫軍具以報咸置之法自此瓜賊滅迹君之功最先時沂水有曹黑三人謀死馮石二人一事獄久定君鞠瓜賊時賊具言殺沂水二人狀乃知殺人者非黑而黑已斬二人在獄衆護前人不欲平反君曰黑死誤耳一誤可再誤耶力白於院讞定乃出二人於獄前令及主是獄者皆獲罪於是民胥頌君神明而忌者遂衆旋以卓薦調滕縣失知府意被揭去官

見沈起元敬亭集

### 隨州牧翟侯

翟侯名枚吉浙之秀水人治隨十年乙為民去害興利者不勝述其最大而奇者丁酉平逆一事初湖南人萬育生自言有妖異術能致神兵奸民附之陰結為渠帥者六七人偽造劄四出煽誘連河南旁近郡聚徒至數百人謀於隨之光化鋪起事康熙五十七年四月某日燒民廬舍持梃刃大噪趨據猷山居民出不意無以禦賊至山半風雨大作砂石飛擊面賊驚潰民乘勢發壘石擊之賊不得上乃徑趨州城呼聲

聞數十里沿路焚剽而隨素無防守將卒變猝起州民大恐動侯見事急親跨馬將左右數十人大呼吾民勿怖第從我立取賊民喜躍立聚數千人擁侯馬而前賊望見稍卻侯馳入賊中叱從騎縛其魁六七人者諭其餘曰賊魁已得汝曹皆脇從吾當言上官宥爾命有敢抗者吾縱騎殲爾矣衆皆崩角稽首曰公幸活我是日也賊以辰來至申而定縛七人外餘數百人皆散不知所之蓋侯素嚴保甲賊初入境即廉得其跡侯故密有備故倉卒出此竒當是時民咸以為神先是獸山寺中舊藏兵器若干夜中居民望寺內火光燭天爭趨救則所藏刀箭鎗礮皆起赤燄熊熊然如是者三夜乃息及賊發縱火燒民舍勢甚洶洶總督滿公率諸監司急勒兵趨隨比至州事已定侯俾七人以獻滿公大喜即以囚昇侯命竟其獄獄上督撫杖七人斃

之見王汝

田贈公

田贈公名雨時字霖商陽城諸生也明末流寇入山西所至州縣多附賊陽城人聚而謀曰賊所過以城坑者必盡殺乃已今旦夕至且若何贈公曰舉城昇賊城中人皆賊矣與為賊毋甯死然徒死而城終勿完死無益不如避之賊何利吾空城且無

所肆其毒。與其以百萬眾攫賊鋒也。眾曰善。陽城得弗殘於賊。亦無一人從賊者。方賊之逼也。贈公盡室行。當是時。幼子年幾歲。兄之孤年五歲。及郊。猝遇賊。公度弗兩全。遂棄幼子。而負其兄之孤入風神嶺。竄崖谷。以免賊去。贈公返而求諸途。則幼子匍匐深草中。望父而啼。攜以歸。俱免於難。鄉人高其義。多以鄧伯道事歸之。贈公曰。不然。吾子與兄子均耳。顧當倉卒時。念伯氏所遺。止此子。此子死。是死伯氏也。吾不忍。以吾子易伯氏。終亦不忍必死吾子也。屬有天幸。果不死。藉令竟死。若謂我忍棄吾子。博名高耶。願諸公勿復言。迄終。贈公世。竟弗言。故相國文端公者。贈公仲子也。未嘗知有存兄子事。久之。文端公令英德少宰甬江仇公過焉。前所存兄子曰慎典者。與少宰縱談生平事。具道五歲時。從叔父避賊。始末。少宰作而起曰。是史氏之責也。夫翌日為文表贈公之墓。其事乃大著。

見汪由敦松泉文集

### 范芝巖

介休范君諱毓。字芝巖。明初有至剛者。自介邑徙居張原村。七傳而至君。祖肖山。公家大起。市易邊城。以信義著。國朝定鼎初。召至京師。授以職。力辭。因命主貿易事。賜產張家口。為世業。歲輸皮幣入內府。子德淵繼之。中歲感疾歸。君代其事。承祖父

遺業。曉暢邊地。阨塞險易。蒙古諸部長。往往知君名。親戚內外。藉君衣食者數十百輩。君一見。悉知其人材。具短長。敏鈍程材。而授之事。事無不舉。燕楚交廣。諸大都。會多所置辦。從君口授指畫。雖生其地者。弗能易。生平坦肝膈。示人人樂為用。康熙丙子丁丑間。聖祖有事準噶爾。官軍餽饟。率以百二十金致一石。且或後期。苦不繼。辛丑西征。官運視前。值為準。君熟籌之。曰。三之一足矣。遂以家財運饟萬石。瞻察漢叟兒軍費。一如所計。刻期至。無後者。雍正五年。世宗討策凌。師出西北兩路。籌饟孔亟。怡賢親王知君前運饟有成效。以君名薦。立報可。君感上知遇。悉力自任。計穀多寡。差道路遠近。以次受值。曰。洪郭爾鄂倫。曰。鄂爾坤推河。曰。塔木爾。曰。查克拜達里克。蒙古爾拖羅海。曰。烏里雅蘇泰。白格爾。曰。察漢叟爾。而以科卜多為最遠。其值自一十一兩五錢。至二十五兩有差。其先後籌運米石。有請於察漢叟兒官倉存贖借支。補運者。有請於直隸山西州縣。及湖灘河所倉粟支給。而輸其值歸司庫。俾出陳易新者。有頓遞於羅鄂波。沿途支給者。擘畫悉中機要。計部一如所請。不少掣其肘。君益得自展布。車輪駝負。所需人工牲畜。器具資裝。芻糧鞅鞋。率先期集辦。臨事咄嗟應手。得經窮荒沙磧不毛之地。崇山沮澤。作屏夷治。接軫銜尾。幕府所在。儲胥充裕。

軍得宿飽前後十年所運米凡百餘萬石所省大司農金錢六百餘萬較最先所定  
值不啻百億萬矣辛亥壬子間寇犯北路所失米十三萬餘石牛馬橐駝稱是憲皇  
帝命據實報銷君以軍興急不可懸待復補運如所失數費白金百四十有四萬不  
以上計部至大兵既撤所運科卜多米膏改輸近地計部概以近值核銷運戶前所  
受遠值當追繳君曰運戶悉窮子所受值隨手罄改運已無力况追所受值乎且追  
亦何可得也即如所改地償其值而代輸所應追者二百六十二萬餘兩先以歷年  
應領米鉛價九十餘萬兩扣抵餘立五限輸計部乾隆三年奉命採辦洋銅運京局  
以抵分限應輸之數又奉命採參烏蘇里綏分歷三年所入視前為多迄不敷成額  
八年部議以應折參價及所逋運值凡百十四萬兩有奇悉辦洋銅輸西安保定湖  
北江西江蘇五布政司備鼓鑄銅產東南外洋長崎諸島賈舶風帆出沒洪濤礁嶼  
中倭夷居奇留難承辦官羈十餘年不得如額指為畏途君曰吾受恩重此吾分也  
立遣人駕巨舟赴洋採辦其始終任事不擇險易類如此以雍正七年特恩優敘子  
太僕寺卿銜再加二級章服同二品前此所未有也十一年以部案波累削職而所  
供辦悉如故國家因才器使善用其長委任當而無遺賢有如此而君之智力誠亦

有過人者。蓋兩得之矣。

見汪由敦  
松泉文集。

### 李孝子

李孝子。名維煊。字裕光。江南寶山人也。生十歲而父歿。哀慕逾常。兒終三年。不離柩。次人呼曰小孝子。家貧無以養母。乃棄舉子業。任門戶。力求甘脆進母。而自食藜藿。母偵知之。呼與共食。遂長齋淡食。以慰母。母得喉間疾。醫不能療。孝子籲天三晝夜。母夢道者。授以針。曰。以汝子故。為汝治之。汗流浹背而愈。又嘗患背瘡。醫言當用艾灸。孝子恐母不勝痛。先自試。輒以大痛乃止。稽顙北辰。願己壽以益母壽。尋亦獲愈。雍正十年七月。海上颶風大作。孝子所居江灣。距海不二十里。水至屋將圯。孝子負母匿几下。俄鄰屋俱毀。而孝子屋獨全。從兄錫秦巡撫廣西。欲招孝子俱行。孝子曰。吾安能以一日而違吾母哉。遂謝之。先是孝子喪父逾年。又遭祖喪。數年無以營葬。常布衣屏居。不與宴會。人或勸之。輒流涕曰。禮不葬不釋經。吾有痛于中也。及卜地。曉浦隆冬。冰雪。手運灰土。僵卧垂絕。有匠人過之。煇火灌以湯。乃甦。體素羸。竟以是劇。將卒。善屬二子事祖母。奉母手大慟。瞪目而絕。

見彭啟豐  
芝庭文集。

阮君世恩字聿修。桐城人也。父曰暉吉。兄世忠。兄弟兩人生而相友愛無間。相對則懼甚。一人以事出。則皆終日傍徨不甯。夜常同榻而卧。有疾病則親視湯藥。未嘗頃刻離。世忠讀書佛寺。忽嘔血。世恩時以為憂。丁卯之春。世忠自為棺。而世恩監匠者。髮漆其上。漆者言。兄死當在七八月。世恩即慘愴悲懷。自以二子小。百曉日。皆成人。而兄一子無母。且幼未授室。願以身代。禱于上下神祇。凡刺血書詞十七紙。而世恩是年遂得疾。踰年世忠病甚。醫多言不治。世恩與同榻卧。而使其二子更迭候。夜間則復禱如前。又刺血書詞十七紙。世忠尋愈。而世恩遂於是年七月四日卒。然不以告於世忠。既沒。而曉日出其父書詞。然後知之。烏乎。世恩可謂善事兄長者矣。見劉大櫟

海峯集

### 趙萬全

明莊烈帝時。會稽人趙應麟者。為書生。貧不自得。託教授去遊北方。與其家約。幾年當復還。後絕無有聞。知留所者。應麟有子萬全。始二歲。依母丁以居。及年十許。問父何忘返。今為何在也。丁持萬全泣曰。兒知憶爾父。安使爾父誠得歸。卒撫汝乎。萬全遽大痛。食飲卧夢。若不甘者。至十九。請於丁。願出求父。丁勿許。萬全曰。母固憫兒。獨



兒去。無奉母者。雖然。願即行。勿顧時月。幸必以父還。始應麟困敝甚。走之京師。冀以  
獲富貴。久客。益流落挫折。崇禎末。大盜入國都。天下鼎沸。干戈棘道路。客游者多不  
得歸。應麟自咤意失。竟轉徙趙代之間。以死棄其家二十年矣。萬全既獨行求父。邏  
淮南北。環齊魯秦豫。返燕薊。嘗數日。乞不得食。裂趺乳血。髮肉脫易。朽然如斷榴。然  
終已不遇。心疑應麟死。覩骸骼之殘。委溝野者。剝膚血滲之。堅不入。乃舍去。復號呼  
於塗。萬全之始出也。懼己不省父狀。取牘書。應麟鄉里名氏年歲。張于背以行。久之  
乃至馬邑。邑故山西邊。萬全旁皇邑中。不得去。張文義者。邑人也。聞之。歎曰。豈為趙  
君兒乎。急走來視。誦所負牘。良契文義。趨萬全。過我。過我。勉具客。我幸識而翁。昔亡  
自兵中。稱何從來。五十餘耳。願已耄。即無所寄食。窮歸我。嘗為我主書。方且哀其旅  
死也。而槨封之。手樹之柳。亦拱於原。得示子矣。萬全擗地哭。奔之隴所。仆地不能起。  
己太息曰。吾初誓求父。生迎使還。天實靳毒子。雖然。固甚不安于藁。痛若罪腰脊。庶  
招魂魄歸。猶或少解吾母。竟裹應麟骨。步負以復於其家。萬全既歸。極勞動。養其母。  
母亡。舍於墳三年。以康熙乙巳歲卒。後四十年。大官有廉其事者。表萬全異孝。為祠

之廟。琢石旌其門。

見胡天游石  
箭山房集

李晉福

李晉福者。事景州諸生趙遵譜為僮。崇禎中。兵入塞。破畿南郡縣。略地至景州。晉福方隨遵譜行野外。倉卒被擄去。家人未知也。去數日。晉福潛自兵中還。言狀。遵譜家皆痛哭。旋呼晉福。已不知所之意。其亡去也。後三歲。遵譜忽自歸。家人且懼且愕。以問遵譜。皆晉福所為。晉福初以被擄告其家。即從遵譜出塞外。備歷危苦。遵譜初見俘時。本乘馬。馬為人奪。與晉福徒跣行居塞外。久之。有騎過。遵譜識為己馬。直奪之。騎者怒。拔刀斫遵譜仆地。流血幾死。晉福負歸土舍中。求藥裹創。僅乃獲愈。遵譜性蠢。負氣不能為人下。晉福戒曰。若此。且速禍。當忍俟之。脫可得歸。縱不然。猶幸免為人戮。而尚欲如家居態乎。兩人在兵中。日益習。其弁校試問晉福。晉福詭言。遵譜吾弟也。兵中嘗呼遵福。有所役使。晉福輒曰。彼小弱不任。為代遵譜役。兵中既多喜晉福者。後稍弛其防。晉福乘間。乃遣遵譜亡歸。竟得至家。遵譜歸一年。晉福亦逃入塞。見遵譜。相持泣也。遵譜於當時無晉福者。擄死久矣。晉福崎嶇不顧患難。死亡以從。遵譜卒能全而脫之。而已亦免焉。彼所謂古烈丈夫之風者耶。

見胡天游石  
詩山房集

戚攷言

戚孝子名弢言。字魏亭。德清人。父麟祥。康熙己丑進士。官侍講學士。以納故禮部尚書蔡升元妾被劾。學士故隸尚書門下。部議援卑幼擅娶尊長妾為側室例。發遣寧古塔時。孝子已登賢書。隨父往。茹齏醬雪。萬苦畢嘗。孝子朝夕左右。無倦容。渠帥咸敬禮之。歷五年。雍正庚戌會試。孝子欲弗往。學士強之行。道出賀蘭山下。驢逸去。襪被盡失。孝子徒步走。會日暮。迷失路途。有老人持燈火導之。追及驢。老人倏忽不見。孝子嘗言宵行時。北風捲沙。林木怒號。狐嘯虎嘯之聲。不絕於耳。自分幾無生理也。及至京師。襪穿履脫。兩足僵裂。沃以溫湯。半日始醒。赴禮部投名。去試期僅二日。主者憐之。得入闈。竟以是科成進士。分發福建學習三年。令連江有聲。乾隆初。詔刑部行文赦諸罪人。成邊者。學士格於吏議。不果赦。孝子聞之。頓足泣。欲去官。或告之曰。不念得少俸以為菽水計乎。且機會尚可俟也。孝子不得已。視事如初。未幾制府郝公玉麟入覲。孝子往送。伏地不起。叩首乞代陳。郝公難之。孝子膝行前。持郝公裾號泣言曰。弢言所以緩須臾死。覩顏而食祿茲土者。冀得一當明公意。雪父冤耳。今明公置勿理。復何望哉。引佩刀欲自裁。郝公貽睞。亟止之。孝子旋取所上書出袖中。皆刺指血為之。郝公素愛孝子能吏事。及是惻然動容。許諾。比入告。天子憫之。特旨放。

學士還。學士以迎養至連江。部民擔酒為賀。孝子與之飲盡歡而罷。益勤厥職。明年學士病卒。孝子輿櫬歸。哀毀骨立。未終喪而卒。時乾隆七年九月二十二日也。年四十有四。見章有  
大集

### 盧象晉

宜興盧象晉。字晉侯。在天啟崇禎間。與兄象昇。弟象觀。皆以氣節顯名於時。象昇殉難。死賈莊國變。象觀起兵。事敗。死震澤。時母李太夫人年已七十餘矣。有何姓者。與其族某訟。辭連象晉。趣象晉急薙髮。母相累不聽。守驗視其頂髮偏寡。謂已薙。復生。象晉厲聲曰。未也。守怪之。趣薙髮。象晉曰。我先朝遺老也。兄弟俱死國。吾頭可與髮俱斷。吾髮不可薙。守怒。榜掠之。具獄當大辟。巡撫疑之。詰責郡守。郡守懼。緩象晉死。乃遺書脇其母。象晉不薙髮。罪且及太夫人。自詣獄。持象晉而泣。守碎縛象晉。而髡之。既而釋之。既出獄。則辭其母。投佛寺為僧。太夫人卒。象晉視含斂。會葬畢。即棄去。遊名山大川。所至一宿。又去。人無識之者。長子勵。徧求之。僅一再見之上。郡都陽間。一日。忽返宜興。其弟之子以尚止。象晉曰。我將死矣。我歸。我告爾葬處。乃自題其碣。曰。委骸磯。且戒之曰。慎毋棺。盛以缶。遂終。見胡宗緒  
環隅集

何靜山

何鼎字夏九號靜山。其上祖當宋南渡徙自河南。元武宗至大三年始卜居浙之山陰。自六世祖詔以下。至公世居山陰。其著籍於湖廣之靖州也。由公之再從祖希公。以康熙丙午舉湖廣。授河南長葛縣知縣。歲旱蝗。禱於神。蝗滅。某甲殺人。辭連乙。屢鞫不就理。公怒。擲刀於地。佯笑曰。甲豈殺人者哉。甲即起持刀去。還詰之。甲伏罪。上官奏循良。公第一。擢江南安慶府知府。調浙江嘉興府知府。公越人。例不得調越。天子曰。朕知子山陰人也。雖然。何嫌何疑。而引避哉。遂之任。與其鄉人訣曰。今日子越人也。明日嘉興太守矣。初太恭人之有身也。有道士歛門而語曰。汝家任子二年而生。生而秀挺。絕貴顯。家人異之。已而果然。蓋公任二十有四月而後生也。公子五人。皆仕宦。經亮經文經永經襄籍從楚起貴籍從越。

見胡宗緒  
環淵集

清 曲園居士纂

汪龍

汪孝子龍歙縣人。祖客死蘇。柩頓舍。父之鳳。斬往迎。溺采石。當是時。龍六歲。哀慟如成人。母偕祖母止一室。龍日夕侍。無違禮。比稍長。詳祖柩頓寄狀。大慟。拜祖母與母。立起如蘇。會撫軍禁淹柩。令無主者。趣焚之。龍徧索柩。無知者。復大慟。自分柩已焚矣。歸邸面燈坐。偶繙卷帙。行間忽忽現徑寸字二。曰以京以京者。龍祖名也。龍驚起諦視。字輒隱已。而忽忽復現。悟曰。神其以銘旌兆乎。復往訪。倏遇灌園叟。前告曰。是役吾所隸也。略悉徙柩顛末。龍偕叟往。諸頓柩縱橫錯置。陰風颯颯射毛髮。在晝猶昏。秉燭下上不可得。復匝諸室。柩左右前後視。又側卧地仰視。卒不可得。最後一室。叢柩紛如。抵拒撐拄中。拂塵晚視。斜隱露漆字七。幾漫滅矣。再三諦審。祖名良是。撫柩痛絕。絕而蘇。當是時。限叢柩不可出。議毀牆。倏雷雨大作。牆外崩。柩出。見者以為孝感也。龍謝叟。奉柩還。色養祖母。母終。其身方龍之奉母以居也。一夕疽發於背。委頓甚。秘勿使母知。入侍譚笑。揚揚如平常。漏再下。告退出寢門。輒仆地。昇牀側卧。始

徐徐呻吟。旦醫至。割腐肉。以藥裹創口。復徐步整冠入侍。越數旬而始復。母竟不知。孝子時年六十三。後五年卒。康熙中有司上其事。詔旌其門。見馬榮祖集

### 桑文侯

桑翁諱天顯。文侯其字。世居餘姚。遠祖仲才公仕於唐。歿為明神。載在祀典。族姓環廟而居。悉安耕讀。自翁遷錢唐。新其堂構。督其子汝甫。辛苦問學。學成名立。卒光顯其前人。世咸歎翁有子。翁童時。以孝聞。後以捍衛鄉井。辭功不受賞。遂以孝勇大著於時。家酷貧。無以為養。廢書治生。力為善行。至老如一日。翁行三。昆季相繼歿。十三喪母。十八復喪父。父患反胃。飲食鮮進。謀所以療父疾者。靡不至。五六十年来。里中有稱善養其親者。其人輒顰蹙曰。吾何敢望小壽伯。有不善養其親者。其父母詈之。即曰。若奈何不效小壽伯。小壽者。翁小字也。甲寅。耿精忠反。翁年甫冠。眾服公義。勇請於官。推翁為練長。翁默禱於祖廟。即誓眾廟中。尊以進退更番之節。約束既定。一軍兀然。九月一日。海上賊舟大至。忽遙望空中。火炬燭天。旌旗紛簇如雲。擁左右翼環甲突出。戛摩鏗然。中一人盛服勒馬立。揚鞭指麾。遂驚遁。海上居民具見之。皆咋舌以為誠感。至今海頭高阜。矗立者數處。潮上不能嚙。即昔日防哨出沒地也。土



人因呼桑公墩翁既學治生尤精岐黃術窮探古方自以意酌量損益望色洞臟腑立起奇疾風雪酷暑中一聞剝啄披衣遄往所全活無算不取直即有與者緣手散盡臘盡或無以卒歲意恒晏如一夕里人入戶四顧無人取物納懷中翁與子從屏隙窺見亟搖手屏息任恣取既去戒子勿洩曰吾不能早周急令至此可愧也又偷兒連夕入戶坐守驅之後夜分穿穴者再翁以鐵器擊地厲聲曰偷不可為也其人躍出伏於地曰自今死不敢為偷顧無資以營生奈何翁憫之給以十緡去卒改行為良民致甫業以文章發皇其篤行同學生無以抗行或謂翁曰翁積德生此高才郎即惶遽却立曰昔人種德謂後世必有為三公者吾不德亦庶幾後世必有為端人者高才能文章兒何遽能爾然亦非所靳也年七十有司議舉翁鄉飲賓力辭謝曰吾何德以堪之後九年而卒翁雖遷錢唐未嘗一飯忘故里尋常與人語語皆錢唐至歲時享祀祝告則喃喃操土音每至餘姚省墳墓顧致甫泣然曰他日幸葬吾先人側吾魂魄應惓惓此土也致甫泣受命大殮之夕雨如注號奔而來者塞衢巷哭立雨中良久不忍去則昔日受恩與起奇疾者也

見馬榮祖集

陸德本

陸紹源字德本荆溪蓮溪里人幼倜儻若成人當明季政衰賦役煩重父濱洲又不善治生致逋賦役急逮之而諸子皆他適惟君最幼獨在慨然曰吾雖幼亦子也奈何使攘攘者溷吾父則隨役以往不令父知至縣縣令方怒甚坐堂皇督逋賦階下鞭撻聲如雷人人股栗次及君君徐行前曰民逋糧罪當死死杖下無辭願謁一言畢命無憾令見君年小霽顏曰若亦何言曰公欲糧完耶逋耶令曰國課安敢言逋曰公為民父母欲民生耶死耶令曰吾亦欲民生耳曰民有兩言於此一者民生而賦入一者民死而賦逋夫民積歲而逋之安能一日而入之公緩其期寬其政令自今粟自石至斗銀自兩至錢皆續入而不加責則民生而賦不逋矣不然民且死杖下安能使杖下之鬼供賦哉令曰孺子言是與定納期而返時甫十有二歲聞者翕然稱曰能年十八則又有北解之役北解者明時所謂白糧運者也明初都金陵內膳米皆民所供後遷北平詔蘇松常嘉湖五府供內府白秬秠米及各府部秬米凡十六萬石俾民運不以軍而運道出長江越金焦沂黃河經呂梁上候遷頓莊十有六關過北海口入通惠河其險阻既非民所素歷而運軍又數凌壓之爭道故遇險輒覆覆則身葬魚腹復於其家責償鬻妻及子者無算以故聞簽為領解舉家號慟

君聞發慨然曰父兄勿憂源願任期年畢運而返聞者益翕然稱能爭欲一識其面  
鼎革時土寇掠其村挾君去至其寨魁大驚曰此陸公也鄉里被公澤多矣我何敢  
犯禮而歸見任啓運清芬樓集

### 姚孝廉

孝廉姚之琅字樹西號梧軒漢陽黃陂人也姚故世族當孝廉時猶未衰願無貴介  
氣布衣蔬食淡泊自甘性卞急不能容人遇有非禮者輒面爭之嘗居京師其鄉先  
達為詩會大集鄉人招孝廉往至則高會飲酒孝廉進而言曰盍拈韻其曹曰姑緩  
已而酒酣孝廉則又進曰盍拈韻其曹曰苟藉此以聯桑梓申款洽耳奚以詩為孝  
廉粲然曰我以諸公為文會是以詰朝來今若此此佚遊也何以會為拂衣竟去孝  
廉方居鄉其所受知者適為令孝廉不一私造令召之輒託故謝及令去官候代則  
日踵其廨雖大風雨必往讀書不屑屑訓詁好為詩時有奇氣尤熟二十二史郡縣  
多聘主誌局森然有法與人談古今事慨慷持所見雖羣非之不少回至口沸目赤  
必伸其說而後已自少時慕閔仲叔范史雲之為人一介不苟妻冷氏荆布操作能  
成其夫子之高見邵大業謙受堂集

倪懋功

倪公懋功。諱國珍。其先江南人。我朝定鼎。有邦俊者。以勦撫十三家賊。為成都撫標游擊家馬。公其孫也。寡言笑。尚氣節。康熙丁酉。舉於鄉。雍正壬子。揀發粵西。授義甯令。義甯之東北。曰雙江。苗民雜處。與楚城步綏甯二邑紅苗接壤。計千餘里。凡口十堡七十有二。大小寨凡數百。鳥言露居。不通教化。百年來。僅設雙江巡檢。以羈縻之而已。公既至之明年。楚人黃順英。吳萬全。煽惑粵苗。偽稱名號。公捐金。令堡目密入苗峒。誘出擒之。諸苗覺。中道劫還。合楚苗為奸。公牒文武諸大府。請兵防衛。提督譚某。發兵四百駐之。苗稍靖。當事者意在撫。公力陳利害。勿應。知府張永熹。巡檢蔡多奇。迎合上官意。曰。小醜何能為。但得一二人。往陳大義足矣。當事者以為然。遂撤防衛之兵。而遣公與多奇及縣丞吳嗣昌等諭之。公歎曰。此所為投虎以肉。徒肆其噬耳。然業奉成命。不敢辭。數日。近苗穴。遙望苗人蜂擁蟻聚。喧聲震林谷。多奇潛易衣。逃象俱股栗失色。或告曰。虜逆已決。不去禍將及公。公曰。吾固知犬羊之性。不先於威。不可以德化也。去則示以怯。今日之事。有死而已。惟朝廷印篆。不可失也。付健役自閉道還。曰。諭我義甯父老。堅壘城垣。以待援兵。無復念我。言畢。正襟危坐。顏色不

亂如常。俄而苗突至。取弁官及隨行隸三十餘人盡殺之。禁公於土室。絕粒六日。縛至烈日中。去其衣。掘土埋足至膝。強之降。公罵曰。逆虜。吾汝父母。汝速死。吾敢辱吾耶。苗以紙筆付公曰。若能為書大府。償黃金萬斤。得不死。且歸若。公裂紙。擲筆於地。大罵曰。逆虜。國家失一縣令。若毫毛。汝類當無噍類矣。苗怒。剗其齒。血流被衣。公罵聲益厲。齒盡。截其舌。公不能言。猶仰面噴血作罵狀。苗衆爭擊死。沈其屍於潭中。事聞。當事者護前。非作公罪。上復遣貴州總督張某。經略楚粵。與提督某合兵。剿之。殲其魁。得公屍。并公前後狀具奏。賜祭葬。贈奉政大夫。按察使僉事。廕其子。見彭端淑白鶴堂集

### 石哈生宋石芝

石哈生者。或曰秦人。或曰蜀人。長七尺餘。力能扛鼎。無妻子生業。自鬻於西安某家。供芻米薪水之役。惟謹。無大小皆喜之。居常寡言笑。無喜愠色。人莫測其為何人。詢之不言。問其名。亦不告。因共呼為哈生。哈生者。諺所謂無能而虛生也。獨與富平人宋石芝善。石芝嘗游滇南。察吳三桂必叛。因潛匿。及三桂之叛也。我朝遣大將軍商善貝勒。及將軍班第討之。與賊相拒於滇之石萬溪。其山三面險峻。獨一面稍平。賊據之。期年不能克。朝廷復遣張勇助之。勇兵西北人。滇路崎嶇。值霖雨。多疲敝。扶杖

而行。旗軍見之。撫掌笑曰。是尚能殺賊耶。號其軍曰張娘子軍。於是石芝黃冠道服。詣勇轅門。軍校疑為賊諜。拘以見勇。石芝長揖不拜。勇詰之。曰。某與將軍同里。聞將軍善將畧。兼下士。特為百萬生靈塗炭而來。獻破石萬溪之策。勇奇之。以禮見。屏人語曰。策將安出。石芝曰。賊所恃者。石萬溪也。彼負險以抗。必將深老吾師。故為將軍計。利在速戰。非用奇不可。勇曰。用奇奈何。石芝曰。此山東南隅。有閒道。險阻無備。可通人。旗軍攻其前。將軍以銳卒襲其後。樹旗鳴鼓。令軍士齊聲大呼曰。大兵已據此山矣。賊衆聞之。必驚怖散亂。破之如振槁耳。勇善其計。次日。大將軍督戰。勇託病。使副將將其兵以行。而潛引三百銳卒。從閒道步行。沿嶺攀葛以上。悉如計。賊兵果亂。遂破萬石溪。勇以為能。留軍中參議。其後平定諸藩。多出石芝策。嘗閒居。與勇語曰。某生平少知己。勇曰。如某者。不足為公知己邪。曰。某與將軍一言偶合。非知己也。所稱知己者。獨石哈生而已。及歸西安。每訪哈生於其家。必攜酒從後戶入。相見。偕至僻地。跌坐對飲。劇談。談罷大笑。笑罷復大哭。興盡。棄其飲器而散。又嘗於將軍幕中。大會賓客。設席虛左。或問之。曰。此待吾友人石哈生也。俄而哈生革冠褐衣草履。昂然而入。揖衆直踞其席。石芝傍侍。執壺傾酒甚恭。哈生亦不稍遜。持杯豪飲。傍若無

衆賓客也。衆大驚駭。卒莫測其為何人。後哈生病篤。其主人將為殯殮之具。哈生曰。待吾友人宋公備之。主人憂其不及。有頃。石芝果至。哈生張目視之。不發一言。遂卒。石芝為痛哭。竟曰。厚葬成禮而去。天下既定。將軍勇欲表薦石芝於朝。謝之。贈以金。亦不受。遂隱於華山云。石芝一出而為張將軍畫策。建奇勳。功成身隱。哈生見重於宋。其才智必有過人者。乃為人奴而不辱。彼其中固有不可測者耶。哈生既沒。或傳其善天文。故明宗室子以石為姓。有託焉。爾要之。此兩人亦奇矣哉。見彭端淑白鶴堂集

宋釋之

宋釋之家富。平好讀書。貧無以資。有渭南石哈興者。傭於釋之鄉。見而奇之。縱令學。以其值給之。發憤鍵門。徧讀諸經史。自朝迄夜。漏下十餘刻不寢。每丁夜居鄰。睡醒猶聞度紙聲。顧不為章句學。學成。賣卜長安。靖逆侯張勇。方少賤。食伍。常從卜。輒效。心奇之。屢立功。至建牙。欲偕往。釋之不可。乃以千金壽其母。迫與俱。事必諷而後行。其秘謀密計。人莫得聞。然勇所向制勝。皆本於釋之。故秦人諺曰。勇之功。釋之功。無何。吳逆蠕動。勇督師。鳳翔寶鷄間。是時三藩聯絡。勢詭猖獗。自大散關以西。皆屬於逆。逆屯兵關口。有驍將馬三保。在滇素所委任。傳令三保至。兵始出秦隴。諸戍卒洶



洵無鬪志。日夜望三保來。即款附。勇雖擁重兵。而部下解體。一日迴翔奧室。釋之。潛至。拊其背曰。嘻。公無以逆故。勇愕然曰。將若何。曰。安坐封侯耳。再問。不對而出。勇思居恒遇機要。釋之不盡言。而半語隻詞。靡不奇中。乃一意堅壁。嚴斥埃申約束。士伍肅然。既而三保為子娶婦。遷延不至。七月。淋雨浹旬。軍皆黑痢死。勇鼓行。憾之不交刃而蕩平。逆授首。蓋天祚聖朝。而釋之。先見若此。事定。勇受上賞。封靖逆侯。勲高。傲晚。獨嚴憚釋之。釋之視一切世故。泊如也。以師事哈興。於是歸。大陳金幣。邀哈興至。欲拜之。哈興瞪目厲聲曰。始吾以若為非常人。乃為他人作嫁衣裳。反以是啗我耶。不顧而去。釋之奉母老。青鞋布襪。徧游各山川。勇蹤跡不可得。或云訪王無異於華山。入不返。當靖逆侯時。天下初定。呼吸風雲。凡珍奇瑰異。王侯卿相所不能致者。皆歸於勇。勇必為釋之壽。釋之曰。若功成。吾去矣。勇固留。防衛甚周。一朝。扃戶不啟。勇排闥入。則釋之遁矣。几帳依然。所餽金寶珠玉。皆匿之土牀中。籍記分寸不失。夫天下衣冠方幅。藉藉稱自好。而錙銖成市。所爭毫釐。反頗相向。視釋之為何如。哈興卒無聞。士論尤高於釋之。釋之能前知。世多異之。或伺其出。竊發其篋。亦無他奇。惟多

曲園居士曰。劉繼貢所為宋釋之傳。與彭樂齋所為石哈生宋石芝傳。互有異同。叙宋事。劉不如彭之詳。而石宋張三人交誼本末。則劉傳較具矣。故並錄之。惟石哈生為石哈興。宋石芝為宋釋之。音近字訛。未知孰是。

王時翔

閩之建甯屬縣二。曰建安。曰甌甯。境域遼夙。民多山居。竟歲或不入縣。令是者。率季冬。歷村落。督逋賦。名曰鄉徼。雍正十年。鎮洋王公時翔。令甌甯。將舉是約。以一復輿。一僮。一役。往客爭之曰。君行日主進。夜必會之。民多道遮行乞判狀。須二記室與俱。僕從胥徒數十人。毋省輿馬。飲食問甲長。意重煩之。俾知吏來不易。早急公也。建令亦期往。盛驕從。且偕牙儈。羈丐行。太守聞之。急召公曰。國家惟正在此。一役。君儒者也。約已懼無以集事。何弗詢建令。公皆謝之。太守賓客。相與笑之曰。迂。比出舍。甲長道見公。色大沮。呼之。遂巡。甲長歛賦者也。令行責供具。甲長藉肆侵吞。聞公捐舊例。則無以魚肉。公知其意。諸人聚。集父老子弟曰。鄉徼所以便汝曹。無跋涉。省糧糗也。願與從。廝役。梁肉芻茭。供自甲長。甲長于汝曹取盈。視糧糗費數倍。吾故單車弗挾。容會計判狀。力能辦。則決不待時。否則歸而治之。非晚。日需飯一盂。蔬一盤。令自治之。

安事厲民為。于是甲長束手。不敢譁于鄉。父老子弟。固已心感公矣。而建令到鄉。重  
箠楚。民憚之。皆亡走山谷。巖石間。令不得民。則培鎖啟扃。搜取鷄豚牛馬米鹽之屬。  
牙僧估以入賦。巨室則令癘丐卧其戶。罵之。甌民益相戒爭輸。是時甌民德公。而建  
民畏其令如螫。既匿不復見。令停數日。無所施。及歸。鷄豚牛馬米鹽之屬盈庭。而不  
可作賦。僧持適市。則市滿酬賤。癘丐卧其戶。卒無得。亦竊散去。賦終虛。而甌民攜錢  
持鋸來者。踵接肩摩。至道不得行。甫浹旬而賦完。公上考。建令坐下第。太守賓客。乃  
相與嘆公之不迂。儒之可用。見劉紹  
敘集

### 康績

義士姓康名績。字方陸。陝西人。有文武才。而豪於義。見不平。怒從中出。弗自禁。方國  
家有事西陲。某王督邊事。募能效力運糧糗者。績慨然應募。至半道。會歲荒。民乏食。  
無以自存。績即盡以所運賑貸。而歸白其狀。願自償所運也。王愕然。而重其義。軍法  
當斬。乃上狀云。績法宜死。而心宜生。上異而赦之。王知其賢而能也。留帳中參機宜  
事。王或過飲。以女樂自娛。輒諫。王改容謝之。一日。復極飲為樂。績驟踰垣入。立王前。  
王悚然。績指羣飲者曰。皆若輩導諛耳。持拳縱擊。拳之所下。筋絕骨折。號痛不勝。王

震懾為跽乞乃已。有縣某好富暴橫不義素矣。弟死孤幼欲逼其婦嫁而奪之財。婦堅不從。網以計將不脫。績與其儕飲。或數息。訊得其實。弟故某庠文弱生也。績忽不見。行途中遇乘馬者假之載。乘馬者難以不識也。績推之奪其馬而馳。至治者家不言所以。取重斧而去。踵暴橫之門。鼓樂喧阗。人馬蹂雜。以彩繒橫縛輿甚固。將肩之行。績近而呼曰。輿中為某嫂乎。內聞呼聲。亟口喊救不絕。碎輿而出之。蓬首涕洟。冤慘不可名狀。暴橫者出不意。率羣暴奔至。績提斧迎擊。輒倒。衆奔潰。婦奪績斧。復擊暴橫者頭如泥。曰。毋以死累君也。之官。績曰。吾惡其不義而殺之。婦曰。渠第仆之地耳。碎其首。塗其腦。我也。會邑人臚不義者暴橫。累累上官。曰。如是猶未足伏其辜耳。遂皆賞其罪。得不死。又某邑宰貪虐甚。民蓄怒久。會旱不雨。宰弗顧。民請於遠方能禱雨之道者。至。應祈雨降。宰怒。鞭道者示於市。民狂沸。宰出。績自肩輿中曳出。衆叢毆之。瓦礫如山。而屍為齏粉。大府憤宰之不職。為民歿。而又素愛績仁義之士也。俱弗深究。而與衆薄其譴云。曾他出。宿於逆旅。見老嫗攜小兒至。兒戲仆傷面。一少婦出。撫其兒。批老嫗頰者數績。以為此主母也。然兒自仆耳。無與老嫗事。何不審耶。既有告以此。乃阿姑者。績怒甚。氣從頂中焰起。直入。梓少婦出。捶之無算。幾死。夫自外

至惶跽。怒責其大不孝。叩首求免。至再四。久乃得解。其義氣之不可犯也如此。祖亮

薛孝子

薛孝子陽生者。名有年。常之武進人也。孝子之父晉申。年五十。生孝子。家貧而好施。常苦不給。孝子甫就塾。即慨然曰。吾當成父志。既冠。力田治生。麤給饘粥。有從弟某。孤弱不能自存。孝子勉為完配。且置產以贍之。族黨閒有匱乏者。父所欲周卹。靡不遂也。父嘗病目。幾喪明。孝子走數十里外。延醫。嘗百藥不效。乃子夜跪而舐之。久之。翳盡。得復見天日。父又遘疾。勺水不入口。三晝夜。孝子焚香籲天。願以身代。父夢神降。稱巫咸曰。汝子孝。上帝許活汝矣。驚呼家人進粥。噉之盡二盂。明日病良已。優游里閭。以樂餘年。孝子時屬親朋具酒肴。閒進博奕諸戲具。逋錢纍纍。稱貸以償。父不知也。日進杖頭取適以為常。父壽七十八而終。孝子廬墓下。天寒月黑。悲風蕭颯。孝子拊膺夜哭。與嗥。狐啼猿相應和。如是者三年。其後遭母喪。孝子痛母如父。目失明。耳失聰。血枯骨立。見者以為人腊也。積哀成疾。疾亟。口念父母不置。嗚咽而卒。論曰。毘陵朝京門外。蓋有兩孝子云。何孝子者。幼失父。即外出求之。走萬里。歷十餘年。卒

得其父以歸。而薛孝子則依依子舍。委曲承歡。服勤至死。先是有陳甲者。以府佐攝  
邑篆。建生祠於郵亭之東偏。竟以墨敗。紳士仍其室為一龕。祠兩孝子於其中。春秋

合祀。見吳龍見  
尉惟集

### 王恩榮

王恩榮者。字仁庵。山東登州府蓬萊縣人也。蓬萊縣小吏尹奇。強性險猾。頗以巫醫  
之術有寵於官。恩榮父永泰。因置產與角口。被毆中要害。立死。時恩榮甫九歲。祖母  
劉氏年高。門戶軟弱。訟之官。不得直。僅給埋葬銀十兩。祖母內傷自縊。恩榮母劉氏  
健婦也。瘞其姑。藁厝永泰棺於市。僦屋其旁居之。大書曰。監子殺爾父者誰也。泣血  
三年。病甚。呼恩榮至榻前。授以官所給銀曰。汝家以三喪易此。海枯石爛。存此志。恨  
不可忘也。監子識之。恩榮既踰罹大事。家盡落。依舅以居。厲志讀書。稍長。補諸生。誓  
於父柩前。尋仇。以斧自隨。其舅患之。誘居長山島中。禁勿令出。因諭之曰。監子之志  
固當。但殺人者死。是國法也。爾父之鬼餒矣。恩榮流涕聽命。恩榮晝取史記伍子胥  
白公列傳朗讀。讀已痛哭。夜靜焚香。長跪告天。絮語達旦。時或困倦假寐。輒連聲覺  
。大呼怨家在此。年二十八。舉子。辭於舅曰。可矣。遂行。踰月。忽遇奇強於道。揮斧急

擊稍遠不中。乃投以石。仆地。道旁人爭抱持之。得免。奇強諱不言。裹足不出。一日偶立門首。又為恩榮所見。直前斫中其首。帽厚偏引至耳。扶傷脫走。其家奔訴於官。時已年遠。吏胥案牘無可證。恩榮出母故所弄銀。陳之訟庭。硃批爛然。旁以血書鈐之。縣令歎曰。至性人也。何不幸而遇此。吾欲尼爾。則傷終天之恨。吾欲聽爾。則違累赦之條。周禮調人之法。具在各為趨避已耳。恩榮于是噉然而哭。縣令亦哭。堂廡內外觀者盡哭。恩榮既再舉不得。奇強亦遠遁棲霞。相隔八年。適蓬萊縣人有患病者。力延奇強禱治。奇強亦以事久稍安。入城過一小巷。四顧無人。方徘徊閒。俄而恩榮突出扼之。奇強皇窘。伏地乞哀。恩榮謂之曰。吾父遲爾久矣。遽劈其腦。腦裂。以足連蹴其心而絕。于是見者驚出不意。相率前擁恩榮。恩榮笑曰。豈有白日殺人。乃畏死者。遂自繫赴縣。會奇強家訟。當日永泰故自縊。非毆死。縣令欲開棺驗視。恩榮請曰。小人已。有子矣。甯抵死。不忍再暴父骸。以受毀折。叩頭出血。縣令惻然。乃為博問於介衆。皆曰。恩榮言是。遂徑詳法司。法司議曰。古律無復仇之文。然查今律。有殺擅行凶人者。予杖六十。其即時殺死者。不論。是未嘗不教人復仇也。恩榮父死之年。尚未成童。其後疊殺不遂。雖非即。猶即矣。况其視死如飴。節烈之氣。有足嘉者。相應特予開



釋復其諸生即以原貯埋葬銀給還尹氏以章其孝且將具題旌禮恩榮之舅聞之見有司曰豎子求見其父母耳夫人遭奇禍以邀旌門式問之榮又何忍矣法司歎曰汝亦賢者也遂止而祀其母於祠時康熙四十八年也

見全祖望  
鮑琦亭集

### 王元趾

王文學元趾名毓著紹興會稽人也幼時樸訥不惠就塾師受句讀苦不甚記憶年十六才學為文即遠過作者尋補邑諸生聲聞日起多四方之交其所至賓朋高燕好挾小史歌兒彈絲品竹雜坐命觴呼盧投壺酒酣以往調笑跌宕竟日夕忘倦素出念臺劉公門最契重之甲申之變南都新政元趾逆知其敗遇越人有自白下歸者從訊時事輒搯腕浩歎曰休矣吾恨不立磔柄人肉喂吾家豚犬也大兵南渡比戶醵金具牛酒迎犒元趾以大義白兩兄曰弟已矣身為越國男子豈蒙面活耶兩兄意稍難之元趾笑曰舍生取義吾不食言願以稚子為託既而復為致命篇又上書念臺劉公曰門人某已得死所願先生早自決毋為王炎午所弔蓋聞公赴水不汲餓十日未瞑也肅衣冠出榜其詩文于宋義士衛士唐公祠趨文廟四拜曰君殉國士殉泮正也泮水淺乃之柳橋下家人聞以報兩兄兩兄曰噫死矣吾弟哭而迹

之柳潭。見元趾端坐水一方。衣冠如故。顏色不變。同邑有儒士潘集。字子翔。聞元趾  
殉。為文慟哭之。竟出東門外半里許。袖二石。自沈渡東橋下死。

見柴紹炳  
省軒文鈔

### 佚老人

佚老人。姓顧。諱大信。字成一。一字天目。晚年乃更號佚老人。嘗言吾靜觀世人熙熙攘攘。非役於名。即役於利。莫不終其身。焦愁其心思。耗散其形神。奔走於萬物。而不能自休。而吾幸無慕乎彼。得優游閒適。以老佚矣。以此自稱佚老人。老人不絕物。為高。亦不苟徇時俗。以為和。人情所共為。不必不為。人情所共好。不必不好。但涉而不著。每於其中蕭然焉耳。既著身鬻序。已而上公車。一再不售。即棄去。獨注意古文辭。尤專精於詩。雖疾病危苦。幽憂拂抑。艱難困阨中。未嘗一日輟吟咏。所存稿。填委篋笥。至莫可清錄於古人書。多所涉獵。悉曉解大義。刊訂謬舛。箋評音注。丹鉛不去手。四方有高僧逸士。騷客詞人。及挾醫藥卜筮諸方技來者。人人厭其欲以去。性通透。疏脫。冬一裘。夏一葛。裁取足蔽體。鄉故多先達。衣冠輿笠。烜煜一時。老人時方袍幅巾。掀髯抵掌於其閒。談諧謔浪。若不知其為顯貴。飲酒不能多。有設具以招者。亦欣然往。往輒先醉。醉即頽然假卧。鼾齁。座客號必主人。擊曲。或優伶歌妓。婉轉雜沓於

前弗知也。善鑒別古器物。真贋立分。一切法書名畫。及種種諸玩具。儲蓄多有。值好  
友相對。時出品題高下。遇知交能賞識者。輒持以贈人。故家無長物。老人於世閒。既  
淡然。一無所營。其性情所寄託。可得而指數者。於業嗜為詩。嗜著書。嗜點定簡冊。載  
籍中疑誤。嗜名理清言。嗜作書。嗜鋤泥種竹。於花嗜梅。嗜菊。於禽鳥蟲魚。獨嗜蜚謂  
其聲清越。激揚似異人。長嘯山谷。閒於境。嗜雪嗜月。嗜舟行。嗜空林遠眺。於味嗜茶  
并為著書一編。曰茶約。品泉淪具。候火貯湯諸論說。補茶經茶訣所未足。老人著述  
甚富。今梓以行世者。如茗鑪隨筆。夢萱堂稿。白門社刻。梅菊新篇。養響茶約諸集。其  
一班也。見王大經獨善堂文集。

### 夏羽王

公諱其。字羽王。棠邑人。幼倜儻有大志。既就外傳。喜讀先秦兩漢文字。作舉子業。發  
明大旨。不以絺章琢句為工。每就試。操筆疾書如宿構。名噪一時。周藩延為世子師。  
先生據皋比。闡經義。世子北面執弟子禮。王亦虛懷折節。不敢以食客視之也。流寇  
圍汴。城堅而守固。王既捐金募士。畢力防禦。而公更從中指授方略。以是屢敗賊。乃  
夜占星緯。知不可守。遂辭王。冒雪歸。公歸。而賊決黃河以灌城。城潰。人服其見幾之

早旋以明經考上第授武昌司李未赴而國變公微服南遷卜居南郊芙蓉山之側自號芙蓉老人萬中野服不入城市與二三老友談經味道暇則課諸孫學業丹鉛者訂而已素履康勝不嗜飲己丑冬忽抱微疴因自念洗腆醕爵古以養老亦以養病乃小飲數杯每歲時伏臘花晨月夕輒陳觴列豆兒孫侍坐或擊案高歌或持杯長歎甲子春不豫滋甚仲夏望前三日召家人語曰此月之十七吾將逝矣乃命筆作絕命詞及期晏坐而逝年八十有四

見張怡白雲集

### 仲子

辛巳冬汪文烈公假滿入都至慶雲邊烽方急公以傷臂調治寓城外逆旅中稍愈散步驛舍見貯餉若干公駭然曰盜賊公行此豈貯餉地且司農仰屋若胡為滯此解官答曰主臣有之但賊騎充斥途無行人若此纍纍者何欲入城而令病之閉不納奈何公慙甚歸詢邸主人曰此閒頗有俠士可與語者乎主人曰去此二十里有仲子者仲由之後也豪有力鄉里畏而服之然不可招致公欲晤則就見之公曰諾凌晨持名刺邸主人導之往至則告以故仲子曰是不難公以木天貴客為國事下交士為知己死已矣三日後當為公解赴司農取部收來公曰善甚須護騎幾何當

謀之邑令。仲子掀髯笑曰：若輩何用？用若輩何為？某自有所與游者。公以名紙全福二十。單帖二百來。公曰：諾。塗費幾何？曰：是無煩公慮矣。長揖而別。三日後，仲子報謁曰：人力集矣。公與解官語之，乃同至驛。則橐鞬而魚列者，約二千人。衷甲裹糧，儼若營陣。公駭然曰：諸君何來？曰：皆某同人家子弟也。因呼其長二十人，拜公廡下。曰：此皆壯士。某所與游者，命取餉出，皆緘木鞘中。曰：是不可以遠行。亟碎之，分攜以往。解官懼不敢任。公曰：無傷。是在我。遂碎之，分置橐中。上馬馳去。時多為公危。曰：此輩舉止頗似大盜。萬一去不返，奈何？公笑曰：安之。世豈有欺人烈士哉？不半月，主人言仲子單騎歸矣。公急出迓，曰：若何？曰：幸不辱命。袖中出部收與公。公大喜曰：前同行諸君若何？當語令一犒之。仲子笑曰：此輩宜屠酤，須酒食耶？幸事畢，各返村舍矣。公曰：君大將才也。當特薦君，且大用。仲子怫然曰：此非知己之言也。我以公憂國急公，慨然見信。試效一臂耳。此世界豈容我輩耶？幸勿復言。一揖徑去。明日，公肩輿往謝。則應門者長跪以辭曰：主人與客為泰山游，昨暮即行矣。見張怡白雲集

曲園居士曰：汪文烈公名偉，字叔度，休甯人。寄籍上元。崇禎元年進士。十一年由慈谿知縣行取入翰林，擢檢討。都城陷，自經。贈少詹事。諡文烈。本朝賜諡文毅。明

史有傳。此事不特見仲子之才幹。亦見汪公之識力。然餉銀在塗。逆旅中一翰林官。碎其鞞。而分授之。不知誰何之衆。解官不敢爭。縣令不敢問。亦可見前代法令之疏闊矣。

### 胡上琛

胡上琛。字席公。始祖某。佐高皇帝有功。世襲福州右衛指揮使。舊制。勲衛得與試武科。丙子中式。甲申闖變。公倡義勤王。乙酉典禁軍。授御營都督。為鎮國將軍。未幾。關兵撤。公自延平步歸福州。寄老母及妻子吳航。獨與妾劉慧娘留。曰。城破我殉國。慧娘曰。公死。妾亦殉。公於是豫求毒草蓄之。及大兵入城。公易朝服北向拜。次拜其先人。次拜老母像。乃設案危坐。坐慧娘於側。供具如常。既酣。索所蓄草根。搗入酒。各飲。巨觴。毒未發。公起步數巡。復坐。笑曰。樂豈不靈乎。又嚼其葉吞之。須臾終。慧娘亦終。俱端坐不動。見薛銘南窗草存。

### 吳子方

吳楷。字子方。閩縣人。性樸直。不容人過。輒謾罵。始為郡諸生。至丙戌。當為歲貢生。聞闕將不守。自榕城移鼓山。為終隱計。是冬。關果撤。乃祝髮稱冒僧。鼓山固名勝。距郭

三十里。逸人韻士。載酒游。則訪冒僧。冒僧與語極歡。聞有所錯愕。必唾罵。乃已。或貴人至。則謝不與通。永和和尚者。開堂鼓山禪院。為天下僧俗敬禮。時接見護法諸貴人。冒僧不悅。罵永和和尚。永和亦輒謝。戒其徒。毋犯冒僧云。見詳銘南窗草存

### 吳隱君

吳隱君。威克者。孝子也。父華元。以誠慤交於士大夫。崇禎末。有丁員外郎。奉詔採銅滇蜀。與華元善。挈俱往。病卒於黔山。問至。威克年甫十八。麻衣芒屨。辭家遠奔。行次潯陽。值左良玉兵敗于賊。舳艫相銜。沿江殺掠。威克不得進。甲申六月。南都李博士頌詔往蜀。威克從之。張獻忠既屠楚。犯蜀。黔粵滇雲皆震動。督師李若星駐偏橋衛。扼五省要害。將軍方國安屯常德府。殘破後。涉江乏渡。一翁駕小舟至。熟視曰。子何為者。抑似重有哀者。子將何之。威克泣曰。僕歛人。籍居儀徵。將求父柩於黔。失路。恐客死。不得與父柩相見。翁曰。毋悲。老夫方將軍幕客也。可隨吾行。至常德。以屬副將王某。抵偏橋。距黔尚六七百里。王曰。前此不能相伴矣。地險多苗。其慎之。威克泣別。所過萬山矗立。有狄無鷄。狉狉乘亂截劫。遇棺輒疑藏金。必破之。威克叩頭流血。得免。掠衣糧繫錮。夜逸去。跣走十五日。抵貴陽。見親柩。擗踊氣絕。經日始蘇。徐乞募葬夫



跪而告曰。吾曹遭斯亂。姑同寸進覓食。衆曰。吾曹感君誠孝。忍不助力。於是取遵義山中閒道。無煙火。拾糧粟充食。晝則同衆舁棺。夜則相與擁肩露坐。達旦。二十晝夜。至漢陽。乙酉三月。抵金陵。以世亂不用術家言。竟渴葬焉。見顧景星白茅堂集

義烈黃公

黃公名明邦。字君亮。歛之孝行里人。父柱。以繪事顯名一時。公夙具巧慧。善詼諧。能世父雅藝。遂耕硯自給。壯不婚娶。所需日用飲食。皆手自庖爨。汲名泉。煮佳茗。供客談笑。終日不倦。乙酉九月。大兵入郡。公掩扉絕食。示諸子弟曰。余雖山澤褐夫。衣草茹菽。受本朝雨露。且七十年。安忍復見此事。子弟勸慰者。多嚴謝之。居恒所御紙屏竹榻。皆分布諸子弟。是夜引被僵卧。引七首自刎。漂血盈席。諸子弟奔奪。不得截喉。篝燈諦視。公猶瞑目張髯。抵夜午。抉脰而長逝矣。其族之儒者。相與議公私謚曰義

烈先生。

見許楚青巖文集

清 曲園居士纂

周貞靖先生

周貞靖先生齊曾字唯一。癸未進士。除廣州順德令。自解官歸里。丙戌後入山為沙門。人稱曰囊雲大師。其歿也。里中謚為貞靖先生。不使淪於沙門也。先生生平出處大節。及他言行著作。俱岸然無所附。自為童子時。讀論語孟子治本經。俱不喜兼集注。率大書正文。默解其義。是其少讀書也。蓋不附傳注。諸生競為揣摩場屋之文。先生盡擺落華藻。自書所得。會試吳磊齋先生奇其卷。判曰自成一解。遂得中進士。是其為制義也。蓋不附主司。當先生時。三吳諸名士競尚標榜。先生漠然無所向。是其於士類中。蓋不附品目。其為順德令。治行第一。當事使攝香山。香山時為上相里。先生與相忤。即日解組。當事留之不得。是其為吏也。蓋不附上官。不附鄉大老。會稽行朝失守。浙河以東。士大夫率俱出。上謁郡縣。通往來。先生不可。盡薙髮入山。白石一鋤。蒼松一筮。同年生有為郡觀察。招以書。先生謝不往。且曰。孤雲去來朝。不知暮宿所。從此無更費八行。是其出處大節。蓋不附一世。先生家居。每一匠者入門。即審視。

其法自仿造所用器。輒能善其事。及於盤谷構山房。束竹覆茅。盡出己手。得懸厓一  
奇木。製為養和。日坐卧其間。拾燒餘以為爐。狀絕古。先生復能受勞苦。其入山當由  
一溪水。嘗沒踝以上。先生謂過溪若須筏。即須竹。須舟。即須版。須篙。須梁。即須編柴。  
即待負亦須人。不如用吾脛。吾脛自善涉。嘗與諸禪人涉。俱不脫芒履。先生謂沙石  
齒齒。芒履質柔。不及吾足版。竟跣而涉。萬悔庵先生嘗訪先生山中。先生為設麵。下  
以齏汁。麥甚麤。先生笑曰。此吾上客供也。時諸公遊跡沙門。率受諸釋老衣拂。椎鼓  
上堂。稱其法嗣。先生獨不肯。雪竇石老人。其欲傳先生益久矣。然微聞先生時一歸  
村居。仍入彥倫之室。遂得止。是其避於釋門也。蓋不附釋門。閒為詩古文詞。未嘗有  
所擬議。單言片句。不蹈前人。是其為文章。蓋不附諸大家作者。黎洲黃先生以先生  
與會稽余若水合銘。兩先生風格並高。未嘗相往來。先生謂自潔其身耳。吾耕不須  
耦者。吾負不須戴者。是其避世也。蓋不附同隱。見李鄴嗣  
果堂集。

### 吳重光

吳重光。桐鄉人。幼失父。恃其祖成立。祖尋故。與幼弟居。粗知書。以家落不竟。讀好氣  
任俠。先是光外姑。絕愛憐光。苦其貧。出若干金為營銜胥。作門戶。一日。衆胥剖與例。

金詰所自。衆告之。故擲諸地。曰：此業錢也。安所不得一盃飯。乃從地獄中覓衣食乎。自是絕足不入官。甲申春。官征三餉甚急。挈弟之鄉理蠶務。完官稅。提筐桑於野。風聞燕京不守。棄筐走入城。問京城壞乎。衆雜曰：然。皇帝奈何。曰：與城同壞。帝二子何在。曰：閹業自帝。安所得二子者。捫腹曰：痛甚。繞屋而啼。踰牆入。仰天號曰：一至此乎。小人革命。遙伴皇帝死足矣。作數字。押硯底。遂自經。弟以蠶飢。桑不至。覓兄不得。入城跡之。鄰母白。頃聞哭聲。戶出。而扁如故。可疑也。急排牆入。救之無及矣。其硯猶濕。

見周拱宸集

### 馬生

馬生。甯夏人也。幼工騎射。讀書曉大義。不喜為經生。制舉藝。見天下方亂。歎曰：誤天下事。制舉經生也。以任俠。流落山東南北間。夙善羅汝才。高迎祥。李萬慶輩。羣賊渠作亂。屠掠馬生。輒棄去。弗與游。嘗過朱仙鎮。拜岳忠武祠。為文祭告忠武。時明崇禎十三年也。是年河南諸土賊蜂起。開州袁時中者。衆數萬。最雄傑。所部年皆四十下。健壯標悍。號小袁營。壽州賊蓋有袁老山。時中故號小袁營。以自別。十四年。時中度可衆二十萬。羣賊多懼附焉。自成攻陷洛陽城。尋圍開封。破歸德。諸土賊多來附。十

五年。朝廷命兵部侍郎某督援。勦兵援開封。自成後。臨歸德。開封亦遂臨。時中以其衆合自成。自成許配以如除歸德城外。地暨高臺十座。列騎張繡。徵梨園伶人十部。臺並奏樂。伎演曲其上。馬生乃往說時中曰。將軍視闖王何若也。附之為尊。安乎。兵興以來。王嘉允被誅。陽城高迎祥。劉哲獻俘闕下。混天王授首於祖大樂。黑殺神。飛山虎。擒殺於盧象昇。他如顯道神。爬天玉。獨行狼等。悉以怙逆昧順。身蒙顯戮。將軍視闖王何若也。附之為尊。安乎。時中躍起曰。作賊豈本願。我獨不得傳汪二公歸命耳。孫督師阻域遙闊。丁公恐未足以共濟。君其為善圖。無兩相負。生於是走援勦軍門。拜伏侍郎前。力為時中乞降。侍郎乃索輸賂百萬為代請。生因極言時中實無有委積。且須四五十萬。生更反覆陳說。慷慨涕泣。候軍門數日。因大言曰。時中為自成軍鋒。素有郤。且冠雄諸賊。將懷不並立之勢。若諸路官軍進蹴其前。時中從中起擊其堅厚。自成可一戰擒也。異時閣部不從。萬監軍說招納羅汝才。俾賊至是。可為近鑿。今失此機。生見神州陸沈矣。侍郎終以弗輸賂。故竟不為受。時中降。十六年。自成殺賀一龍。羅汝才奪其軍。汝才大呼。恨未能從馬生言決降。固當至此。時中聞之。益不平。蓋當許女日。時中已引軍去。穎毫間別營矣。至是復用生計。斬自成偽官。並游

騎頭送河南巡按御史乞降。自成以軍攻殺時中。而小袁營以滅。自成部曲至百萬。衆馬生曰：「我不忍獨負時中。因自縊岳忠武祠內。」馬生嘗導李萬慶降。萬慶者。賊中號塌天者也。襄城之役。卒能臨危致命。賊非盡無良。在御之者耳。馬生生平。惟稱生不自名。見何梁晴江閣集

曲園居士曰：考明史崇禎十五年春正月癸未。孫傳庭為兵部侍郎。督京軍救開封。六月庚申。詔孫傳庭出關。兵部侍郎侯恂督左良玉軍援開封。此云援勦。某侍郎。蓋即侯恂也。明季政以賄成。并軍前事亦取辦於賂。嗚呼。朝政至此。不亡何待。

### 陳曹二子

陳子名允昌。字充彝。鎮江丹徒人。少為諸生。薄制舉業。從事天文地理律歷。旁及太極六壬奇門諸書。與同縣曹子去非相友善。陳子學既博。人鮮窺涯際。乃語去非。獨解領明崇禎時。徐相國光啓。推定歷用勾股測弧法。主黃道緯度。陳子顧言未悉。合參取劉基郭守敬一折衷利瑪竇。間以占候。罔不驗。吳姓將出師。先事向人言。輔臣行出將。弗及寇決還。已而言果中。大兵未渡河。輒數語人。某時渡河。某時且渡江。生平所著天文地理圖說卦變論星長躔次歲時占驗教學參同辨正凡若干卷。曹子

去非名廷傑。家貧善讀書。更喜飲酒。以跛坐卧一小閣。元日拜先聖廟。與師景城何公神主。終歲不再出。酒後搦管。立草數千言。家人告薪水匱絕。明唔弗顧也。陳子數諷止其飲。曹子笑曰。遭時濁亂。我當希與陶阮仙遊。子達者。顧止我飲乎。明天啓閒。嘗一至京師。代諸詞臣館試。輒擢高等。館都御史楊漣家。時漣疏糾逆奄魏忠賢二十四大罪。疏出。曹子手。曹子閒以示陳子。陳子覽未畢。色勃然變。數吐吐曰。謀害皇親一案。引督師輔臣為徵。此大錯。國家方倚高陽公為安危。致奸璫日媒孽君側。其不壞我長城倖矣。然璫運已促。諸君留身為新主資。甚踰於捐軀無濟也。初奄黨疑疏出。繆昌期。陷之獄。曹子心竊恨之。是後遂杜門不出。見何紹晴江關集

曲園居士曰。楊忠烈劾魏忠賢二十四大罪。世莫知其出曹廷傑手也。宜表而出之。然二十四大罪。實無謀害皇親。引督師輔臣為徵之說。此所云云。又可疑矣。

### 張三愛

張三愛。歙人也。年四十。不妻。受役於其主。主貧。或告之曰。妻之可乎。張曰否。愛主在不並受他人恩也。主固老縣令。逋租令索租急。當予杖。愛屢代主受笞。至百數。不少。懟愛為人修長。且健筋力。多種蔬。售悉以其貲歸。輒充衣肉於主。且曰。主老。不忍一



日衣肉缺也。獨養母所充衣肉與主同。一日母病且篤。愛家貧。自度力難置藥。乃乞牛羹於道路。路人曰。若愈母。便可以肝愈之。趨而禱於神曰。母病人告我以肝愈。我且以肝愈母。乃出短匕首。自割其胸。五臟皆見。不見肝。復默禱之神曰。久矣哉。愛之不誠也。須臾肝墮出。愛急伸右手。以匕割肝如指許。徐以左手。緩緩還其破肝納於腹。束以白麻。以肝和羹奉母。母一飲而輒愈。先是愛恐自昏憤。默祝於神。至是不大痛苦。明日。其兄聞諸醫。醫七日而創亦愈。愛主老。未受允。以弟之子嗣。嗣為人性黠。驚數恚愛。主易箒時曰。若事我。我且逝。女可便逃去。愛弗肯。事兩嗣如事主。且曰。不敢受主遺墨。輒遽齒平人自大也。嘗與其里人修荒墓之約。凡里中貧乏。不能以掩者。無主暴露者。愛自度貧無力。悉相率其鄰近。荷鋤載畚。以封築完固之。見王鳴雷中秘文集

程士章

孝子姓程氏。名士章。伯達其字。世為歙巖鎮人。生未識父。父巖註以太學生操鹽筴。開種遼陽外。未幾卒。所交馮都司者。葬之高達子阡。付牒守焉。語蒼頭。識其地而歸。訃於時。孝子生六年矣。母王得訃。慟幾絕。孝子亦慟絕如成人。其祖拊之曰。兒至性如是。他日歸骨有望矣。蓋姑語慰王耳。孝子聞。輟哭。瞠立。問遼陽道人。噴異之。二老

暨王相繼厭世。孝子年十二。稍長。惴惴懼不立。王前已為聘鮑氏女。既受婚。謀之比鄰翁。將為父歸骨。翁語孝子。遼陽八千里。徒御風而往乎。因言之方。司徒任子以巽而授計焉。以巽心重孝子。常語人。吾當成其志。孝子用是依之十四年。適以巽暴卒。孝子大慟。曰。天不欲吾歸父骨。而奪方公乎。巽子士達。慨然曰。父志也。諭諸同志。而身捐其半。以三百金假孝子。孝子感泣。遂辭行。蓋是時蒼頭可法。八十猶健也。挈之從。孝子附舟入潛。夜夢天坼。若有神謂之云。覺而水發舟中。衆譁莫措。孝子泣禱。水忽退。舟衆弗測。至直沽。發裝。則魚首鱗。競謂孝子異人。不知為孝子也。歷八月。始抵其地。訪高達子。已久下世。主僕惶惶。莽曠。一路人。晚法不去。法就詢。則高子世勳。故童時執役。註者。因相持泣。出牒證墓所。孝子具棺啓窆。則儼然冠服。眉鬚也。伏之。慟再拜起。遂失所覩。惟聚骨而已。孝子以生未識父。不敢誤。萬一嚙血濡之。良然。手其骨。諸指如或撫之者。集而失一膝。孝子慟曰。是其安之也。忽巨蛤吠不已。且若乘物焉。視之。即膝在焉。易殮。以一羸載骨。南道山海關。羸蹣躑不進。孝子持註出關。故符焚而號之曰。父可入關矣。皎若掣而羸從入。自是道無留。凡四月抵家。未至一夕。孝子妻鮑。夢偉衣冠丈夫。偕王坐堂上。明日註骨至。合王葬焉。

吳虛壑

王不庵有吳虛壑小傳云。虛壑吳氏名懷。始安人。早喪母。從父厲齋公南飛。落落鮮合。寓齋公卒。虛壑遂孤身狂走。西登嚴子陵釣臺。默坐竟日去。乙酉春。予游天姥。獨踏峯頂。有風自東北來。山谷鳴吼。亂雲如擲絮。偶諷太白句。失聲長號。虛壑聞之曰。是奚為者。循聲而至。相見則大喜。一語連日夜不休。自是浙東千里名山大川。毋論昔人扣舷伐木之地。即古今共棄人所不道者。予兩人無不歷險窮支。往往落日孤峰。徘徊不忍去。時有蔣生者。從予遊。每佳處。輒為吟詠。以示兩人。但顧笑而已。蔣生竟不得意。趣所在。月餘先舍去。虛壑乃出所經山川險隘。遠近諸圖。數十緡示余。余以各得辨證之。虛壑復大喜。酌酒慷慨謂予曰。子有父兄在。非可同余浪游。余將舍子孤往。苟慊吾懷。熱骨寒泉無恨也。未幾去而復來。來又去。數載始聚。予曰。可已乎。曰。未也。又忽去。後予遁於禪。聞虛壑在吳。吳中人莊事之。有以詩文贈質者。一日即棄去。諸人則日置酒擊鮮為奉。虛壑傲然曰。爾將尸居吳懷乎。竟馳去。詣余。余固止之。而虛壑是時亦倦游矣。友人曹生謂予。虛壑奇男子。既鮮兄弟。不可使無嗣。予語虛壑。虛壑良久曰。必貌陋。無一能。非處女。則可。生不測所謂。予曰。第從之。得曹氏女。

曾適洪者。姿首既拙。僅能事中饋。閒則兀坐如立樞。予過虛壑。必聯牀夜話。往往達旦。曹生亦時時來聚。杳不聞帷內聲。食具即自供。午夜炙酒淪茗不倦。予因歎曰。此真吳虛壑婦也。虛壑喜讀史。至是益肆力焉。嘗於夜讀有感。撫案痛哭。聞窗外有物騰突去。叢簿作摧裂聲。殺殺動人。次日見籬下虎跡。大小不一。谷口農家犬豕。皆為虎攫去。虛壑貽予柬云。中夜忽感舊游。放聲一哭。林閒葉落不已。山婦執壺起。立助予哭。聲震空山。虎豹聞聲遁去。此時况味。恨不得王生共之。予賦空山哭紀其事。又數月。虛壑竟去。期於次春還。不至。前所從遊蔣生者。有故人自衡山歸。言虛壑卧病山寺。予念甚。屢於夢中哭之。又越歲竟不至。亦無從通一字。復有識虛壑而自楚來者。曰。聞有狂生久病山寺中。後不知所往。或云虛壑已歸粵。或曰猶在衡永閒。予曰。虛壑安所歸哉。殆死矣。其婦還依母。則猶曹生授餐也。

見王焯鴻逸堂集

### 黃孟通

黃孟通名憲。華亭人。少即無賴。年十三。誤殺人。逃之嘉定。日糾里中小兒為搏戰戲。一日羣衆聚大塚閒。命羣兒列於前。獨坐石臺上。指揮叱咤。有老人晚之曰。孺子喜是乎。何不從師。孟通怒。欲毆之。近輒顛仆。遂拜於臺側。師之。盡得其技擊。嘗附一商

船舟人盜也。縛其商沈於水。語孟通曰：汝自投死耳。孟通視諸盜中一人持大斧，擗甚。因偽伏哀請，遽起奪其斧，斫之。盜墜水死，餘皆驚遁。孟通起商於水，得不死。操觚急去。易舟匿蘆葦中。羣盜跡至，不得。乃免。商人以百金謝，不受去。既復以殺人下獄。暨得出，乃從吳淞千總張喬興挾鹽徒出沒海洋。喬興敗，孟通潛遁太倉。值觀察沈公選將材拔用。孟通矯捷過人，每從檣上窺賊，能相去數丈。持刀躍入賊舟格殺之。賊覘知孟通即避去。又嘗入嘉定訪舊，已醉卧。主人憑程訴其仇。孟通默無語。數以空拳擊牀，既得其里居，曰：吾欲睡，卿可去。主人去。孟通踰垣出，抵所讐之居，急叩門。以他事引出。拳殺之。明日傳某死，主人奔告孟通，謬相稱快，竟不言也。賊犯安慶，孟通隨總戎許自強進剿，宿松之敗，自強僅以身免。孟通獨將三十騎，縱橫賊隊中，歸而備兵使者馮公。奉巡撫張公命，選將材。孟通復就選，諸藝過人，而不諳策論。視平日之能文者，奪其策以獻，遂得第一。謁謝時，馮公稱其文武材。孟通以實告，公益喜。曰：此即英雄舉動也。白之張公，授把總。後以許某副將貪污，為自強所惡，斃之。海舟

中。見王輝鴻  
逸堂集

崇小兒

榮小兒者。古遂城人也。父凱歿。家落。母趙氏。雖不出貴族。恥依人作臧。獲久之。竟無棲止。乃假市廛中。遷卒半舍以居。草簾葦薦。鵠面鷄衣。苟延已耳。小兒幼。痴聾。父母以其痴也。不命名。但以小兒呼之。人呼之亦同。自壯。至老。不易。小兒既痴。不能貿易。兼無資。日乞於市。性至孝。每出門。必向母叩頭。歸亦如之。食必跪進。擇其旨者。食母。餘自給。母食之甘。則起舞。否則泣。或值所乞無幾。母留之以啖。子小兒見食。不如常。則泣。如是者。終身如一日。小兒雖行乞。土人重其孝。無空者。或聞以酒肉饋之。坐是小兒得養其母。至七十餘。以無病終。死之日。小兒痛不欲生。時人哀之。為助棺。葬於邑西之二郎山。自是小兒日。則叩頭於母之舊坐處。歸亦如之。擇其乞之旨者。不得跪進。每傍徨瞻顧。泣不已。冀北舊俗。清明前三四日。爭挂紙錢於邱隴。麥粥杏酪。以祀祖先。趾相錯也。小兒走墻。饋遺盈篋。攜之二郎山祀母。憩卧古樹下。為狐狸鴉雀食之。比醒。疑母之果食也。踊躍起舞。既而覺其非。伏地大慟。土為之溼。鄉之耆老聞於邑宰。邑宰繇孝子。扁旌之。小兒不知。行乞拜跪自若。每思母。哀哀而已。年七十餘。亦以無病終。土人義之。為附葬於其母旁。

見陳德燕山草堂集

永嘉狂生葉尚臯。字天章。順治丙戌秋。甌始歸附。尚臯婆娑市上。或歌或泣。如優人狀。家有妻女。皆棄不顧。夜則偃卧市旁。或數日不食。如是者八閱月。丁亥仲春上丁。狂益肆。陳詞孔子廟。橫甚。郡伯朱公。執白兵使者。雜治城隍廟中。時尚有欲活尚臯者。曰且繫獄。在獄三月。多作詩歌。一日取毫楮作自叙賦絕命詞。以手扼吭而斃。時端陽前一日。故其詩有未斟蒲酒腸先斷。不沐蘭湯骨已香之句。見朱鴻瞻竹園類稿

### 坦然先生

先生姓周諱文煒。字赤之。祥符人。素行屹立。人稱為如山先生。先生曰。吾如山哉。吾乃坦然者耳。因以自號云。少以文自豪。尤喜賓客。嘗數至千金。輒為人緩急立盡。而先生固安之。游太學久。以例補諸賢簿。諸賢令某貪而善鬻獄。每以意旨諷先生。先生固爭之。有妬婦以炮烙斃其妾。令屬先生驗。邑人觀者傾市。先生逮婦痛笞之。人無不稱快者。其夫詭曰。是婢也。毆婢死。法不至抵先生曰。創非刑斃人。家自為律。其罪甚於殺人。奮筆擬死。比復令。令已入其夫重賄。庭質婦。觀者隨往。見令反杖妾父。所引斷乃如其夫所言。遂相與譟于庭。謂令乃不若簿。令方抱慙憤。及先生至。又厲詞色與令力爭。客乘閒謂先生曰。先生自此如山耳。安所見坦然哉。先生曰。噫。此



固吾之所以坦然者也。當爭則爭。于吾正為平易。而子何疑哉。今日夜銜之。而先生初不以為慮。方日與其邑人陳洪緩者為五洩游。歷七十二峯。且徧往返。至六七。每當奇曠處。洪緩作畫。而先生自為詩。卒以忤令。左遷王府官屬。會母喪過哀。竟以病去官。家金陵。教其長子成進士。出為濰令。歷官中外。至戶部侍郎。人以為先生榮。而先生自若。于所居為昔有園。與向時賓客觴詠其中。謂之秦淮釣侶。又豫置一棺。當風日晴好。被酒入卧。使諸孫羣繞呼之。或擲梨棗出。使競相奔拾。以為笑樂。更自撰為墓志。無何而侍郎被讒。請詔獄。客為先生憂。先生曰。吾今固甚念之。然吾生平無一念足死吾子。而吾子又類我。於理不死。行當雪耳。卒與客飲酒自若。已而事果得雪。如先生言。子二長。即侍郎名亮。工以德業文望著。學者稱櫟園先生。次亮節。見董

正誼堂文集

### 蔡湘

蔡湘字竹濤。松江上海人也。幼穎敏。讀書目數行下。里有董先生者。授湘學。悉以藏書畀湘。因得縱覽博通。年十八。治裝別其父母曰。兒居海濱。終無所成就。願北學中土。庶從賢豪開游。歸侍大人未晚也。遂渡江踰淮。客齊魯。已而轉入京師。南海程職

方見湘詩大為延譽。於是萊陽宋觀察新城王考功皆迎致之。湘才既高性又忼爽不肯脂韋從俗醉輒詈其座人人目為狂沛縣關山人飲合肥龔尚書坐尚書酌山人曰君名能相人此閒誰定奇士山人晚視良久掀髯曰吾所知布衣一人殆異才公曷致之問其名曰上海蔡湘尚書立騎邀之湘敝衣冠惘惘而前一座為改容已各賦詩。衆客方沈吟閒而湘泚筆疾書不加點尚書擊節歎其敏且工也。經歲西去踰井陘將歷龍門太華之勝經太原會嘔血太原周郡守館留之其友潘稼堂見湘稿向作多削去問之曰燔矣君其謂我畫地而趨乎即此亦烏足存庸詎知異日之不為灰燼乎未幾之交城謁趙令君令君與語相得館之邑署旬餘始出龔宗伯程職方兩手書訝其初不以通曰公賢無須此所以出視者不可沒兩公愛也在交署七月病劇潘自太原往視之執手泣曰君來吾瞑矣問所欲曰吾負大人吾負大人為吾謝職方君不及報矣須臾氣絕年二十六

見周筭採山堂集

### 金文

金文者業販鹽浙中為東南財賦之藪而海濱斥鹵鹽賦興焉給引於商者曰官鹽舍是悉為私販賣及買者兩罪之文少與仲氏出沒江湖閒凡販鹽之徒遇輒相邀

奪為利。獨文兄弟所至。人無敢櫻者。既而仇家縛仲。刺兩目縱之。文為稍戢。來家未之梅里。歲丙戌。鼎革之初。愚民多相聚為盜。距梅里半舍。曰嘉會都者。為其藪穴。四月下旬。盜率黨來劫。居民狼駭豕奔。恣其焚擄。是夕。文載鹽五六艘歸。近市望見火光。知有變。乃部署諸艘。退伏支港。約曰。賊歸。繞出其前後。呼應相接。并力擊之。賊可殲也。乃率四五人往據移寶橋。橋為賊歸要路。文持槩。餘人彎弓貫矢以俟。羣盜舟方滿載。首尾銜次。相與謳歌笑樂。是夜雲霧塞天。相對昏黑。莫辨。而賊舟炬火獨明。將至橋所。十餘丈。大呼詰曰。來舟何為者。盜錯愕。因對。矢發貫賊手。賊遽擾亂。後舟詰之如前。不能對。輒注射之。餘舟擁擠。不敢復前。賊數十人。乃執炬持器械。舍舟登岸。適伏舟衝賊前。至。呼詰相應。文輒持槩從橋上躍就之。左右刺賊前二舟。舟覆。後賊皇遽。亦多赴水以逃。文躍入賊舟。橫利之。是時伏舟出賊後者。亦衝至。相與呼應。遂合力奮擊。聲震四野。賊不支。愈擾亂。顛仆落水。溺者甚衆。其登岸散走。竄伏榛莽。葦荻間者。村人又搜括之。皆反手縛送。至文所。文至西塘口。南面坐。諸人持刀斧繩索。立其旁。以聽命。列羣盜於前。驗其衣溼及體裸者。多推入水中。間或擲火焚之。其強武有力為賊首。及偵探為賊耳目者。疑似間不能悉辨。死八九。方是時。兵燹猶熾。

盜賊多有。故文以匹夫得生殺之。莫有非者。羣盜就戮。率恣意以逞。或繫樹仰射。或斷手足。或截腰剖腹。血肉淋漓。而觀者方恨賊深。不以為怪也。是日有一塾師晨出。露草沾裾。疑盜也。縛而焚之。頃其徒來。始知故非盜。其他冤抑者。可勝計哉。是役也。盜約計五百人。自溺死者三之一。縛而投水者五之一。斬斫焚燒死者十之一。餘則散走村堡。擊掠以死。其得免歸者。不過十數人而已。里人多其功。向所載鹽大室。斤率以百計。小戶以差減。咸五其價償之。并所入盜遺金錢衣飾。充溢棟宇。家大殷富矣。初文少壯無室。窺酒家女新寡。有姿容。且能持門戶。求焉不獲。至是強擁負歸。人不敢問也。時有曹某者。曾與文角訟不相下。一日出郡。人舟皆失。蓋文陰賊之也。其縱恣如此。方其擊賊也。當事異之。欲招致麾下。文謝曰。某一介無他能。會賊自潰散。因擊之。某何功焉。卒不就。顧謂其曹曰。吾少無家室。嘗觸法犯禁。不以為慮。今幸有妻。且衣食粗給。又安能趨趨俯仰。為人驅役耶。乃大治其室宇。華美越常製。服用器具。務求精麗。日與其曹縱博劇飲。妻為擊鮮割脯佐之。未幾晨出近鄉。竟為人磔殺。莫知主名。後鄉人有疾。常憑依焉。禱之則愈。見周質錄山堂集。

八大山人

八大山人者。故前明宗室。為諸生。世居南昌。弱冠遭變。棄家。遁奉新山中。雞髮為僧。不數年。豎拂稱宗師。住山二十年。從學者常百餘人。臨川令胡君亦堂。聞其名。延之官舍。年餘。意忽忽不自得。遂發狂疾。忽大笑。忽痛哭。竟日。一夕裂其浮屠衣服。焚之。走還會城。獨身徜徉市肆間。常戴布帽。曳長領袍。履穿踵決。拂袖踴躍行市中。兒隨觀譁笑。人莫識也。其姪某識之。留止其家。久之疾良已。山人工書法。行楷學大令魯公。能自成家。狂草頗怪偉。亦喜畫水墨芭蕉怪石花竹。及蘆雁汀鳥。翛然無畫家町畦。人得之。爭藏。棄以為重。飲酒不能盡二升。然喜飲。貧士或市人屠酤。邀山人飲。輒往。往飲輒醉。醉後墨濡淋漓。亦不甚愛惜。數往來城外僧舍。雜僧爭鬪之。索畫。至牽袂捉襟。山人弗距也。然貴顯人以數金易一石。不可得。以故貴顯人欲求山人書畫。乃反從貧士山僧屠沽兒購之。一日。忽大書啞字署其門。自是對人不交一言。然善笑。而喜飲益甚。或招之。則縮項撫掌。笑聲啞啞然。又喜為藏鈎拇陣之戲。賭酒勝則笑啞啞。數負則拳勝者背。笑愈啞啞。不可止。醉則往往欵欵泣下。山人有詩數卷。藏篋中。秘不令人見。山人題畫及他題跋。皆古雅。間雜以幽澀語。不盡可解。面微頰豐。下而少髭。初為僧。號雪個。後更號曰人屋。曰驢屋驢。曰書年。曰瀘漢。最後號八大山。

人云。見邵長蘅青門鹿稿。

### 唐太史

太史唐公名夢賚。字濟武。淄川人也。生有異資。二十三歲登上第。入詞林。三年授史官。章皇帝初親大政。一日。有中涓奉二冊書至政事堂。命詞臣之通國語者。繙譯以進。乃玉匣記元帝化書也。公曰。此非聖之書。何由得瀆御覽。詰旦拜疏。陳說孔孟之道。謂不在六經之科者。不當並進。越數日。又爭御史張煊給事陰潤事。侃侃數千百言。甚切直。惡之者。必欲得而甘心焉。卒賴聖明。僅罷官去。閉戶讀書。益肆力於詩歌及古文詞。世皆推服。性耽山水。日與司寇高公念東。宮詹李公吉津。徜徉嘯傲。為林下遊。歷燕趙吳越。悠然忘返。在廷諸大臣有欲薦之者。公遁跡惟恐不深。雖姓字亦不輕示人。桐城方樓岡學士至廣陵。一大吏問曰。公同年生有方吉者乎。方愕然。大吏曰。旦有懷是刺見顧者。問何自。曰。自山東來。微聞其從者曰。己且進士也。故問公。方曰。此必予友唐濟武也。拆其唐字為姓名耳。追之不及。見王暉霞舉堂集。

### 胡孝廉

胡孝廉名貞開。字循蜚。生而夙慧。九歲時。父仲宣國博。同叔休仲庶常。攜之過茗溪。

溪有施竹捷截流而窒魚者。庶常戲問曰：捷前後左右皆水也。魚觸捷當別去。何依於此。為人所烹。對曰：獨不見蒼蠅之投窻紙乎。求進太猛。求明太急。知進而不知退。見明而不見暗。是以不免。比長。補杭郡諸生。游吳門。訪金沙周介生。約合南北同人。結大社。檄徵四方文輯萬餘篇。選八百有奇。名石鼓桐。鏤版行世。孝廉少任俠。好與邊人武士接。習弓馬。旁通劍技。有蕭塘顧四者。以善相馬。游貴公子之門。偶攜婁東貢家紫騮來。孝廉以百五千緡易之。常馳戲兩峯三竺間。一日從湖隄出定香橋。會樊學使致虛。讌僚友於湖。酒酣步隄上。小坐龍王堂桃花下。肴核既具。意氣方豪。孝廉忽驟馬直前。勢不能束。几席為之傾倒。落英如雨。坐客皆辟易。有仆地者。學使怒。命隸追之。至隄盡處。有橋。橋上輿臺廝養。羣執棍杖截馬首。禁不得行。孝廉乃退馬。違橋六七丈。提鞭外向大唱。一縱徑過。度葛嶺。迤邐循城而東。涉沙河。出皋亭之背。穿林越莽而歸。日尚未暝也。學使以大索不得。令城中凡有馬者。悉詣官按驗。孝廉聞之大笑。年三十八。舉於鄉。為崇禎己卯歲也。流寇起。關右。朝廷從大司馬議。令今年鄉試舉子。於中式後別試騎射。如果超距破的。該撫按即行咨部。擢以異等。顧天下承平久。士大夫恥言介冑。估畢家多不識。決拾為何物。九月上旬。監臨王侍御同。



主考衛宮諭顧兵諫洎提調監試諸司升武帳集舉人於壇下張侯較射衆謝不能  
孝廉騁馬挾大黃拓弦三發皆貫革主司大喜明年下第南還遇賊於汶水之西同  
行者膽顧不敢進孝廉怒馬獨發抽矢引滿弓逐賊四十里過市下馬裸衣踞胡牀  
納涼樹下諸同行者方到相與上酒樓劇飲咸驚歎為天人甲申後將以孝廉老矣  
新令仕宦者不應詔禍且不測制府聞孝廉名強出之署嘉興府刑官兼攝鹽官縣  
篆選湘東司李謫商邱丞罷去所至具有實政然皆非其志也嘗謂耳體空受感最  
捷因號耳空居士孝廉本無意於時既歸乃鑿宅之西北隅為池卷池土而上為岡  
為巘為絕壑為礪道為小橋平坡坡之脊築室三楹轉而入閣閣旁複道架小屋五  
椽蝶叟藍田叔倣南宮父子雲山一版因顏曰米山堂堂中設長几一以展書畫方  
几二以時食飲竹牀木凳石盃瓦鑪不使有塵俗氣虛閣望遠岫平疇四時陰晴變  
幻不一屋內書數架備觀覽早起參楞嚴經一則自言收其放心非佞佛也飯罷讀  
史有當意者隨筆記之午餘臨法書一兩行或作奇峯一幅以寫胸中壘塊客到則  
烹吟茶劇談世外事小住即與蔬食濁醪為秉燭之叙興至步月不送不迎雖居近  
市塵閉門風雨如深山然故仍稱孝廉以明志

見王醉霞  
舉堂集

陸承祺

陸孝子名承祺字又祉。父夢蘭客死粵西鬱林。時方軍興。踰年而凶問至。承祺與弟承祚年尚弱。號慟拜辭其母王氏曰。兒不得父骸。不生還矣。家酷貧。二子焚髡走萬里。道乞食。其間疾風盲雨之所飄搖。懸崖絕壑深溪仄約之所危恐。山妖水蜮。狸鼯豺虎。睚眦而上下。而又有烽烟戎馬。關壘譙訶之警。卒至鬱林。入鬼門關數十武。有老嫗煮糜以餒者。二子踞問父柩所在。老嫗指叢箐中云。彼纍纍遺棺。率朽敗不可問。傳聞是中有浙江人。是耶非耶。二子乃詣前刺血滴骸。凡閱十餘棺。皆格不相入。二子乃拊膺叫天。哀感行路。而忽遇父故人。道棺在蕭寺。二子隨以往。撫棺一慟。皆隕絕。時聚觀者見二子死。皆大呼孝子孝子。急以水漿灌其喉。久之承祚醒。而承祺竟氣結不屬死矣。承祚孑然。匱雨骸。左擔以出。蠻煙瘴雨之鄉。繭足黧面。還家報母。母已蓋棺數日。先是承祚道遇鄉人寄書歸。母慟嘔血曰。不意吾兒先我見。夫子於地下也。既卒。哭數日。夫柩已歸。吾何戀。絕粒六日而歿。

見馮景  
解春集

俞老僕

馮山公有俞老僕墓誌曰。老僕姓俞。名文。金華人。少讀書。明大義。身長八尺。廣眉修

髯耳長三寸許。發聲如鐘。為讐家所陷。囚於獄。吾父出之。德焉。妻身為奴。老僕性嚴。未嘗見齒。儕輩憚之。然事主恭謹。老僕析薪姑蔑山。家中爨不乏。嘗行山遇虎。挺擊之。斃。人勸勿再往。老僕不應。其婦哭而牽其袂。老僕怒叱曰。人生聽命於天乎。抑聽命於虎邪。絕袂以去。時年七十矣。子兒時好嬉戲。老僕常柔聲規戒。子易之。不以介意。數抽棘為矛。與鄰兒十餘輩戰於園。皆蒲伏而歸。老僕有子。年與子齊。亦召之使戰。老僕聞。笞子數十。子始憚老僕。從此罷嬉。老僕在家日少。歸必問子所讀章句。請誦之。熟則大喜。以山中五色文石獻子。子樂焉。每歸自塾。釋書於几。揖父母起居畢。徑詣竈下。望薪有無。以驗老僕至否。蓋子年十二。猶數望薪。老僕一夕醉。進諫曰。官乎。此非弄石時矣。日長炎炎。去成人幾何。不書之愛。而石是好。蘭溪之石可勝幾乎。失時不學。負老奴矣。其聲益微。予悲傷其意。且心忤。遂大奮於學。然猶歸家數望薪。念老僕不念石也。康熙癸丑秋。敝廬大火。老僕年七十九。左擔而趨出於火中者。率為人奪去。惟老僕不失一物。至今又十許年。耄矣。不能入山析薪。猶自扶杖至江干。問薪價低昂云。老僕在余家三十八年。未嘗一日病。今丙寅夏。卧牀不起。聞子自淮歸。強起。謂其婦曰。扶我謁相公。老僕于余凡三易稱。兒時曰官。壯有室。則曰翁。子游京

師。上書當塗。名聞天下。老僕歎曰。此真相公矣。遂稱至。今蓋老僕三易稱。而子髮亦種種矣。沒之日。予見薪而泣。明日執爨者告市薪。予益泣。飲之如禮。葬於不食之地。遂誌之。

見馮景  
解春集。